

律

金華府

在省城南五里

領縣八

三國吳寶鼎元年置東陽郡以其地在金華山之南澍水之東因以爲名鄭緝之東陽記云此境卽會稽西部嘗置都尉理此梁武帝改置金華郡按玉臺新詠以金星與婺女爭華故曰金華也隋平陳置婺州亦以此名○南齊沈約爲東陽守於郡治西南隅建玄暢樓賦詩八章時稱絕唱宋知州馮伉更名八詠樓今錄其一曰登樓望秋月望秋月秋月光如練照耀三爵臺徘徊九華殿九華玳瑁梁華榱與璧璫以茲雕麗色持照明月光凝華

入黼帳清輝懸洞房先過飛燕戶却映班姬床桂
宮裊裊落桂枝早寒淒淒凝白露上林晚葉颯颯
鳴鴈門早鴻離離度湛秀質兮似規委清光兮如
素照愁軒之蓬髮影金階之輕步居人臨此笑以
歌別客對之傷且慕經衰圃映寒叢凝清夜帶秋
風隨庭雪以借素與池荷而共紅臨玉階之皎皎
含霜靄之濛濛輔天衢而徙度轆長漢而飛空隱
巖崖而半出隔帷幌而纔通散朱庭之翼翼入青
瑣之玲瓏寒階悲寡鶴沙洲怨別鴻文姬泣胡殿
昭君思漢宮余亦胡爲者淹留此山東唐嚴維送
客之東陽詩明月雙浮水清風八詠樓少年爲客
處今日送君遊崔顥登八詠樓詩梁日東陽守爲
樓望越中綠窓明月在青史古人空江靜聞山狖
川長數塞鴻登臨白雲晚流恨此遺風宋謝朓前
題江山此愁絕寒角夢中吹飛鳥過帆影流塵空
戟枝水交明月動槎泐故洲移已薄齊梁士猶吟
沈約詩元趙孟頫前題芙蓉秋色爛朝暉作賦登
臨客未歸羽士曾聞遼鶴語征人又見塞鴻飛西
流二水玻璃合南去諸峰紫翠圍如此江山良不
惡休文何事不勝衣○輿地碑目云婺州古城在

郡西南四十里廣袤五六里相傳爲古州城基○
宋州衙在今子城內正北署曰浙東第一臺是○
通判廨舍在州衙西今爲守禦千戶所而郡治乃
宋添差通判廨舍也紹興十三年知州周綱所建
俱有碑存○仁風堂在治內取晉袁宏答謝安語
未揚仁風之義○自公堂在州衙後舊名野聲亭
宋大觀中知州詹適重建因改今名○與春堂在
郡圃東舊名魚水堂堂下有池池中有臺跨梁其
上夏秋小艇容與其間亦周綱建○最高亭在府
治北宋葉衡園內陸游有記○休文井在府治西
相傳沈休文爲郡守時嘗乘驢入井數日乃出井
傍有石刻存○寶婺觀在子城西南隅隋平陳太
史以其地當婺女乃立祠于城西北隅唐開元中
徙其像于開元觀五代時刺史錢儼始移今所星
祠之下有古桐一株每與簷齊則出大魁宋紹熙
癸丑陳亮及嘉定庚辰劉涓相繼廷對居首應其
識○迎華觀在州宅北子城上宋元符二年知州
孫載以金華山直其北改爲迎華觀○法隆寺在
通濟橋南峰寺前經幢高五丈刻云唐大中十一
年立其幢累石爲之皆青色製琢精奇幢下石隙

周匝有大金錢徑二寸許以杖舉之宛轉其中竟莫之得俗呼金錢寺○觀音寺在城北尉司之後舊有觀音像或云卽天王寺之觀音也宋李泰發謫藤州過婺憇於寺中婺州乃其舊治人皆莫之識泰發孫孟博隨行因作詩曰道上何嘗識故侯解鞍聊復小遲留莫向漳江更南望四十八驛是藤州寺有銅鐘題字保大二年歲次乙酉以年表攷之當在同光三年○塚廟記云星君塚在城北一里舊天主門內城西隅有地隆然俗呼爲星君塚寺北有待制趙栢墓栢洛陽人宋紹興間帥廬州死于酈瓊之難子孫居婺州梵嚴寺殯馬郡守孟猷爲塋茲土又五里爲錢大王墓地名沙溪按卽唐末清海軍節度使判婺州錢元懿也墓有巨碑未刻而石羊虎之類凡十餘頭又其地有宋趙杵祖墓清獻上塚時留題碑存○宋鄭剛中墓在縣東三十五里招福原○孝友二申君墓在縣南三十五里石人潭側朱文公書○又十五里爲白沙王廟碑略云神漢輔國將軍諱文臺字高明嘗討赤眉還誅新莽功成造鍤船遊東海見石帆于永嘉徧歷名山而没于婺故祠之今白沙村有昭

金華府志 卷之九
利王廟卽此○徐將軍廟在子城西一里晉人名
伏督兵來婺平賊有功後塋于此昔年于廟左浚
渠有古冢無碑碣惟存一鏡甚損上刻永和年號
○長仙王廟在城南三十里之長仙源宋孝武時
郡守蔡興宗祠也郡人陳某爲之記○唐呂二先
生祠在學宮三賢堂側唐公說齋仲友也呂爲東
萊伯恭授徒于此學士宗之○明學士王忠文公
禕祠宋文憲公濂祠俱在八詠門外○開國勲臣
越國胡公大海祠在清波門內

金華縣附

東漢析烏傷縣地置長山縣因以長山爲名吳置
東陽郡而長山其附郭也隋廢郡置婺州改縣爲
吳寧尋改爲金華蓋長山與金華本一山云舊治
在婺州東四十里唐開元中刺史梁猷徙今所攷
唐會要開元四年升金華爲望縣○韓无咎集云
婺州登臨之處其東爲雙溪閣其西爲八詠樓而
極目亭在子城上舊雙溪閣址也八詠樓已見上
按雙溪在縣城南一曰東港一曰南港東港源出
東陽大盆山經義烏西行入境又滙慈溪白溪玉
泉溪坦溪赤松溪經石崎巖下與南港會南港源

出縉雲黃碧山逕永康武義入境又合松溪梅溪水遶屏山西北行與東港會于城下故曰雙溪又合白沙溪桐溪盤溪之水入蘭溪謂之激溪按石崎巖在縣東三里二百二十步高十餘丈俯瞰大溪巖下有洞洞中嘗見梅花汎出溪澣因名梅花溪又三十里爲天中湖固與黃演松溪諸湖相爲映帶者也○縣西五里有灘極險名五百灘俗傳牽挽湏五百人方可渡唐李白詩聞說金華渡遙連五百灘他年一攜手搖艇入新安○屏山在城南五里一名琴望山又名赤山正當縣治之前又十五里爲銅山東陽記云山下有泉其色鮮白曰銅泉異苑云孫吳有軍五百破洞得一銅釜欲破之忽水從洞中暴發遂成湖溺人又五里爲石門山高三百丈有石對峙如門水乘高而下者三級人稱龍門龍門之東又有里愚山宋儒王栢與倪公度兄弟講學其中稍西曰沐塵山高八丈山之東西各有石人峰與玉笥山稱三峰○玉笥山高三百餘丈以形似名折而東有望山宋旣亡樞密倪普遜隱於此每登之以望臨安者又十里爲南山府治之賓山也其高無筭周四百餘里其北自

栝蒼來南則遂昌松陽宣平東則永康武義西則
龍游湯溪諸山皆相聯絡深邃幽遠千峰層疊高
入雲表陰崖積雪經春不消上有龍湫名三斷水
三斷之東名大溪小溪流出爲上千下千直至梅
溪元陳樵遊南山詩磴平如席草茸香盛夏宜人
石氣涼杜宇血銷添碧燐山鷄食罷化餘糧赤松
有約吾將老白髮無愁不解長醉便枕流眠石髓
看雲不用據胡床○又十里爲白原山高千餘仞
二百餘峰羅列于前深入有石巖卽仙人黃初平
宴坐處明金信詩云花開三樹紅重屋波漲溪流
綠遶村咫尺春泥初雨後尋常嶺石是雲根○輿
地志云芙蓉山在縣北十五里高千餘丈孤峰獨
起秀若芙蓉故名宋謝翱詩流水北山北芙蓉峰
影長看花春到寺數竹午過廊厓石侵衣碧山雲
沐髮香老僧呈佛骨見畢下胡床蓋題芙蓉寺作
也又五里卽長山以山中常有五色華現唐天寶
間勅改金華山然與梁山煉丹山盤泉危石逶迤
十里皆芙蓉山之支耳亦俱有黃初平故事按初
平晉蘭溪人號赤松子年十五其家使牧羊遇道
士引至金華山石室中兄初起尋之四十餘年一

日遇道士引入山相見問羊安在初平曰在山之東初起視之但見白石初平叱之石皆成羊初起遂絕粒服松栢茯苓亦得仙輿地記云長山本名長仙赤松子採藥於此故名後呼訛字亦隨改山高一千餘丈周三百六十餘里山巔雙巒曰玉壺曰金盆壺中有湖名徐公湖週迴四百八十步昔有徐公者至此逢二人共博自稱赤松子安期生酌湖水爲酒以飲之徐公醉臥及醒不見二人而宿莽攢聚身上因以名湖湖水分兩派而下其瀉於山之陽者由山橋達溪其注於山之陰者由鹿田入洞石盆中有飛瀑瀉出若玉虹下垂注爲赤松澗兩岸對峙高數百仞有石橫跨其石溪流折旋爲瀑爲湍分合凡數處○鹿田峰巒聳拔上有沃野可耕其中多奇石有東西二寺宋方鳳鹿田聽雨詩禪棲投倦客山雨起更闌牕葉散幽響石林生峭寒洞深猶暗瀑江遠忽風湍想像雲蘿外應宜晚色看謝臯羽有鹿田聽雨記○山下之洞卽道經所稱三十六洞天也洞有三曰朝真曰水壺曰雙龍亦稱三洞朝真洞居山巔巨石如龜橫當其穴穴中數石如人名羣仙洞其傍一石蒙覆

玲瓏若被纓絡名真人洞洞中水涓涓流名澗室
下注泉一泓有嶺曰風門嶺風迅如扇上有垂蓋
類蓮華高四十餘丈絕頂幽峭莫測朝真而下百
餘步至玉壺洞洞在山腹深十餘丈泉聲淙淙若
金革懸崖而下石皆離列水奔注其中條沫成簾
長三十餘丈雙石嶄然壁立曰石筍自水壺五十
步至雙龍洞洞門軒豁如大廈洞中一穴有石屈
折而方名仙田其下石杵扣之有聲傍石嵯峨儼
如積雪下有龍潭水尤清冽謝翺記略云下洞之
右有椒亭亭上望洞若鏡甕洞內外分爲兩山由鏡

甕入可坐數百人有穴如墓頤水自頤入地中下
山篝火臥小舟由頤入進至岸寥泐空廓行颿颿
有聲由右轉左復從頤出洞外行二百步至中洞
自洞口束炬回旋入地底出出二里至上洞上洞
又分左右爲兩變惟開闔石形而成人物之類者
凡六十有四□柳宗元龍城錄云金華山卽今雙
溪別界其地有仙洞俗呼爲劉先生隱身處其內
有三十室廣三十二里以炬照石刻云劉岩字仲
卿漢室射聲校尉當恭顯之際極諫貶於東陬隱
身於此莫知所終道士蕭至元記○吳錄地里志

云常山仙人採藥處謂之長山山南有春草巖折竹巖巖間不生蔓草盡出龍鬚相傳赤松子羽化處又有似龍鬚而麓大者名虎頭草不中爲席但以其穰爲燈炷抱朴子以左元放言此山可合神丹免五嶽洪水之患者也山之西有紫薇巖石室深廣數丈梁劉孝標棄官隱於其下著類苑山棲志等書郡人呼爲書堂巖其東曰九龍洞有石奔湧潛溪之源出焉山之東巖曰上霄洞石壁環抱如城郭或曰卽優游洞計其距縣東北已三十里又五里曰新洞宋紹興間一石摧下傍露大竅風自中出振動山谷三日方息洞皆石乳採之爲餌與鐘乳無殊後有人負糧束火舒百尋之縷以窮其深未幾巨石自墜掩其洞口云梁沈約詩朋來握石隨賓至駕輕鴻都令人境絕惟使雲路通唐舒道紀詩松老赤松源桃間廟宛然人皆有兄弟誰其得神仙雙鶴冲天去羣羊化石眠至今丹井水香滿此山田曹唐詩莫道真游烟景賒瀟湘有路入金華溪頭鶴樹春長在洞口人間日自斜一水暗迴閒繞澗五雲長往不還家白羊成隊難收拾喫盡溪邊苜蓿勝花宋蘇軾初平牧羊圖贊先生

養生如牧羊放於無何有之鄉止者曰止行者行
先生超然坐其傍挾冊讀書羊不亡化而爲石起
復僵閻丘仲詩人皆愛兄弟物外不相忘天下未
安枕山中空對牀石閒羊不見丹去井猶香空有
寒松在青青閱世長王安石詩定林喬木老叅天
橫貫東南一道泉六月杖藜扶石路午陰多處弄
潺湲○東山在縣東五十里高千餘丈東屬東陽
南卽武義之八素山其高巘曰齊雲岡中有齊雲
寺宋紹興人商日新與子夢鶴避地於此日新歷
官太子少師與賈似道不合棄官歸宋亡隱此篔
笠鋤耒不復巾袵見人又二十里有葛公山高千
餘仞五峰卓立下有二石筍高數丈若華表夢鶴
東山詩云野雲迷石磴山果與猿分睡足蓑衣雨
不知晨與昏明金信詩東山秋色靜處處樵歌起
涼風催早霜落葉不知雨○太陽嶺在縣東北五
十五里俗傳嶺與太陽齊高故名踰嶺卽浦江界
宋錢奎詩健步捫霄漢林披細路分一筇支落日
兩屐踏層雲鳥影空中度雷聲澗底間憑高窺下
界錦繡絢晴文○嶺下爲淨刹菴唐元和建舊名
東巖金信詩云林綠生夏雲蕭然水晶域今日復

重來青苔見行迹雲生身上衣月照松下石竟坐
聞疎鐘空山未眠夕

蘭谿縣

在府西北五十里

孫吳置三河戍于金華之西部唐咸亨五年始卽
其地而置蘭谿縣取蘭谿水以爲名○縣城東有
亭跨東山之勝曰東峰亭唐馮宿碑記略云貞元
十七年歲在辛巳十一月己未朔七日乙丑縣令
洪少卿建其碑殘缺邑宰洪君名亡適當首行寂
下字滅吳師道識○戴良東峰新亭詩云昔余駐
蘭陰頗得江山趣日上東峰亭遙望水東注別去

曾幾何重來已遲莫一時同遊者大半髮垂素亦
或臥空墳翳彼梅花樹因之念所思倚欄聊四顧
安知遊日時翻是傷心處咄茲露電身誰似金石
固此生縱滿百會合能幾度獨有溪上山年年只
如故○東陽記云蘭谿縣治西南六里有蘭陰山
其上多產蘭故名蘭陰以其橫截大溪又名橫山
大溪卽蘭溪也其源有二一自衢城東北流至縣
曰衢港一自婺城西流至縣曰婺港二水合而匯
于蘭陰山下類羅穀文又名激水有潭曰橫山潭
深不可測亦名龍潭其西塢有洞與北山小三洞

相通唐許渾送客歸蘭谿詩花下送歸客路長因
過秋暮隨江鳥宿寒共嶺猿愁衆水喧顏瀨羣峰
抱沈樓因君幾南望曾向此中遊宋楊廷秀曉泊
蘭溪詩金華山高九天半夜雪裝成珠玉案蘭江
水清千頃強朔風凍作琉璃缸日光雪光兩相射
病眼看來忘南北恨身不如波上鷗脚指爲楫身
爲舟恨人不如沙上鴈蘆花作家梅作伴折綿冰
酒未是寒曉寒真欲冰我肝急閉籥蓬擁爐去竹
葉梨花十分注○城東南有大寺山矗拔數十丈
以山巔及趾俱有佛刹也其西南有嶺曰倉嶺俯
臨大溪東北有塢曰桃花塢舊有山意亭○烏石
山在縣北與黃大山相連本一山以石色蒼黃而
異名舊傳大溪經于其下尚有絆舟之跡又十里
有水山山多流泉泉有三源上曰鮑源中曰盛源
下曰繆源各深十數丈近東曰金臺山夜每有光
近西曰叅龍巖高一丈深廣五六尺○古城山在
縣南二十里高阜中峙兩山環其左右山脊有城
周二三里缺處如門元于石九日登古城山詩信
步躋攀感舊遊寒烟衰草思悠悠西風白髮空驚
老晚節黃花獨耐秋宇宙幾人歡暢飲江山一片

古今愁淵明三徑今還在自笑不如歸去休○洞
巖山一名靈洞山在縣東二十里高百餘丈靈洞
凡六而著名者三曰白雲曰湧雪曰紫霞三洞相
環如貫珠其東北一峰怪石屹立人稱小飛來峰
峰下有泉曰天池泉清鑑毫髮浴流而出爲桐溪
洞巖山口有天井巖高百餘丈下有天井龍潭又
有金龍金鷄二山元于石洞巖山詩萬疊嵐光冷
滴衣清泉白石鎖烟扉半山落日樵相語一徑寒
松僧獨歸葉墜誤驚幽鳥去林空不礙斷雲飛層
巖峭壁疑無路忽有鐘聲出翠微又題三洞詩四
山迴合向幽泉古木蒼藤路曲盤一局棋殘雙鶴
去石屏空倚白雲寒又斷崖怒湧四時雪虛壁寒
凝六月霜倚樹老僧閒洗鉢碧桃花落澗泉香又
洞門相對是吾家朝看烟雲暮看霞鐵笛一聲山
石裂老松驚落半巖花○柱竿山在縣西二十餘
里山多紫石如珠山之陽有三泉卽古西井也山
巔舊有歷陽侯范增廟元唐良驥建齊芳書院延
金履祥講學於此旁有高峰名將軍山山之左爲
佛山上有洞深不可測○東栢山在縣西南二十
五里東溪流於其下近西曰瑞山昔產瑞麥故名

又五里曰社山上多嘉木又有龍門山狀若游龍
夾道如門○屏風山在縣東北二十里山有小洞
泉水噴出大旱不竭又進曰十二曲山上有飛瀑
如簾山路凡十二曲故名○香山在縣北三十里
山產玉蘭無葉而花白下有香溪卽蘭谿之下流
也宋范浚居其上又二十里爲解石山山名小桃
源有青霞館丹井丹竈諸遺跡方太古詩山谷良
窈窕白雲何其多考槃懷碩人樂此山之阿谷口
富黎栗鳴鳥集高柯吾欲剪茅茨白雲爲深窩琴
書娛枕席野徑牽藤蘿載構三無堂以佇萊婦過

○香溪之東爲東山以此山在溪東而名范浚東
山詩云山作屏風雲作籬岩堯亭子俯漣漪絕知
此地風光好直謂主人踪跡奇側塞亂花紅被逕
檀欒高竹翠緣陂惠連自喜陪幽賞判却歸時倒
接離○東山相隣曰密山平野中突起數十丈上
有觀音巖巖中怪石如筍又名佛迹山近西曰白
露山石巖如帶霜露妻清秋冬之際尤難爲懷○
又十里爲三峰山峰下有巖廣三丈相傳葛稚川
修煉之所唐中書侍郎徐安貞書崑亦在焉宋景
定甲子九月金履祥來游有記○白石山在縣西

金華府志 卷之九
四十里其石如玉又名玉華峰玉華之左四五里有大石高數百丈飛泉直下溜石成溝又左四五里有石柱高百丈周十餘丈相望有硯山高數百丈盤亘二十餘里山頂平正有池如硯山之西爲陳嶺石路峇嶷千有餘丈接龍游壽昌二縣界○白鶴山在縣西北二十五里俗傳爲白鶴仙人煉丹處陸震詩云雨洗長空染出秋逼人清氣試霜裘山輪秀色滿平野月送夜涼歸小樓薑薦黃芽蓴賽酪豆垂青角酒登筇平生誰似瞿曇老不逐晚山相對愁○又北三十里爲巖高峰旁有勝觀石高四十餘丈方太古詩去去高峰近嵐光撲眼賒橋衝古寺直路趨野溪斜掛樹蘿翻葉含雲潭瀉沙倚松還足力孤鳥下山花

東陽縣

在府城東一百五十里

唐垂拱二年因東陽舊郡之名分烏傷及廢吳寧縣治置此縣梁開平四年錢鏐惡楊行密之姓同音奏改東場宋咸平二年復故○孔山在治東南二百步宋丞相喬行簡居第在其下有孔山堂雙峴樓釣游亭皆理宗御書額○月巖在縣南二里下臨大溪巖形如月故名又六里曰三丘山高三

百二十丈周二十里晉殷仲堪義熙間東陽太守嘗登此山惆望後人思之比於襄陽之羊祜因名峴山山有二峰對峙曰東峴西峴西峴峰飛瀑數丈自巔而下注於澗淙淙如漱玉宋熙寧縣令王槩作亭澗上名水樂亭蘇轍寄題水樂亭詩君不見武安臺前立曲旗官高利厚多憂悲又不見夏侯好妓貧無力簾箔為衣人莫識兩人操行雖不同辛苦經營實非一不如君家激水石邊流聽之有聲自無憂笙竽窈渺度溪谷琴瑟悽咽穿林丘高人處世心淡泊泉聲過耳皆為樂退食委蛇石

上眠幽音斷續床前作正如古人樂易多歡娛積土為鼓塊為桴但能解作太古意君家水樂真有餘○甌山在縣西南十里高三百二十丈周二十里寰宇記崑山頂上有孤石高三十丈其形類甌卽此山也東陽山水記云晉陳安居學道之所下有白雲洞深五丈廣如之石壁有竅泉從中出宋慶曆間縣令鮑安上有善政嘗憇此山之岩因名鮑公岩○赤石山在縣東北十里一名孤絕山上有赤崖不生凡木又七里為鶴巖山高二百丈周十五里上有風穴風從中出颺颺有聲巖有二石

如鶴竦立故名又六十里有東白山高七百三十丈周五十里峰巒疊宕起伏隱見與會稽天台諸山相連屬中有水流入東陽溪○青臺山在縣東二十里高三十丈周二十里突立以山色長青故名青臺又三十里有覆舟山高五十丈亦以形似而名相近有西白山高四百五十丈與東白山相對峙又一里有嵬山山凡六面上有井三十六○夏山在縣東南四十五里高七百丈周二十里山巔有池廣二丈深四尺冬夏泠然不盈不涸側有禹廟故山以夏名又二十五里有歌山山有石室可容百餘人山下水通臨海昔人乘舟望見女子汲水山下登岸而歌姿態端美舟人不知爲神而挑之神怒乃墜三大石以塞水源遂不通舟又三十里有大盆山高五百丈周一百三十里形如覆盆傍有小盆山溪水出焉二山之間有盆山洞者老傳云梁昭明太子讀書于此洞中有石如盆徑二尺深尺許其水清甘常滿卽東陽溪之源也東北入縣導義烏之水南合画溪至郡城○画溪一名東陽江距縣南三十里羣山縈連草木如画故名迤西而南十里曰橫溪又折而南五里曰荆浦

溪其源皆出大盆山西入義烏縣界與東陽溪合
 ○唐劉禹錫詩東陽本是佳山水何況曾經沈隱
 侯化得邦人解吟詠如今縣令亦風流右寄于興
 宗作也興宗以寶曆二年令東陽剡涵碧亭下穿
 方池引水流觴晏公類要云在縣南五里山水竹
 木交映亭表最為勝處興宗詩曰高低竹雜松積
 翠復留風路劇陰溪裏寒生暑氣中宋元豐五年
 縣令鮑拯與僚屬修禊于此復得池南一岩巋然
 崛起縣尉唐最書鮑令岵三字刻于石壁○右其
 地有唐詩人羅隱宅宋曹冠詩翠微深處足幽居
 騷客當年此結廬蓋詠此也元祐間有僧剡庵于
 此名栖賢庵○塚記云三國斯敦墓在縣東二十
 五里○晉樓湛然墓在縣東白北村○晉許孜墓
 在縣北七十里藍礪村其上有虎峰即東山也孜
 傳云孜字季義二親沒建墓於東山躬自負土列
 植松栢亘五六里時有鹿犯其松栽孜悲歎曰鹿
 不念我乎明日忽見鹿為猛獸所殺置所犯松栽
 下孜悵惋不已猛獸即於孜前自撲而死舊志鹿
 為虎殺後人因名曰虎峰有虎峰寺宋王槩公詩
 路出元安望虎峰峰巒高處萬株松山僧迎客輕

金華府志卷之九

九

如鹿古木成槎怪似龍飛溜濺衣寒有韻斷雲生
足暫無蹤凌危更欲尋東白東去濃嵐又數重□
按此乃攷營其親墓也攷墓在縣東北五十里資
福院側宋宣和中院燬于火獨藏經皆變爲石卷
軸宛然叩之有聲右輿地紀勝所載王象之東陽
人故其言當有據○唐杜曉墓在縣西五里曉字
明遠昭宗時痛父讓能死非其罪晦迹不出後仕
梁官至尚書卒于難贈右僕射子孫避五代之亂
散居於此○晏公類要云唐杜叔倫去思碑在縣
治前達州刺史陸長源文○東陽志十卷宋洪遵
景嚴撰以樞密出判時南渡紹興二十四年

義烏縣

在府東一
百十里

漢會稽郡有烏傷縣異苑云秦有顏烏父亡負土
成墳羣烏啣土助之其吻皆傷因以名縣唐武德
七年改名義烏今縣東四里有顏烏墓墓東三步
有墳高一丈五尺方四十丈卽烏父母墓也烏傷
溪去烏墓一里後漢東陽人趙炳與閩中徐登遇
于烏傷溪之上各試所能登禁溪水水爲不流卽
此處矣水經注曰吳寧溪出吳寧縣經烏傷謂之
烏傷溪者也又二里爲鷄鳴山昔有金鷄鳴其上

羣鷄皆鳴故名山高五十丈前瞰縣郭傍臨大溪俗以九日登高於此亦名登高臺又四里爲石門嶺連山中斷兩石對峙如門又六里爲南山蟠折縈紆廣袤數里上有平土可耕人多居之鮎溪之水出焉西流入大溪○又十里爲石樓山一名白巖山高五十丈周十三里四面孤絕兩山相峙狀若浮圖山東西皆有巖深袤數丈東巖凹處西巖有石如欄干護之稍西又有數穴兩巖層級高下數重危樓複閣羣巒環繞若屏幃然○青巖山在縣南十里高五十丈有象鼻岡本朝學士王禕墓衣冠處又有齊山高二十丈下有雙澗南曰前溪北曰梅溪禕詩云幽僻青巖中結屋開荒畦羣山列左右雙澗列東西蕭然守岑寂環堵蓬蒿齊林泉幸清勝吾將以冥棲○又十五里爲雲橫山一名雲黃山一名松山高一百四十丈周二十里上有峭壁高百丈廣三十五丈俯臨華溪有石青白而紫曰飯石下有旋螭池水紋旋如螺形蕭梁時邑有傳大士名翁字元風少以漁爲業普通元年遇胡僧高頭陀語之曰爾彌勒化身也何以漁爲因令鑑於水乃見圓光寶蓋卽悟前因因問以修

道地方頭陀指松山雙檇木曰此可矣翁遂於此
行道輒有黃雲如蓋盤旋其上後人因名松山曰
黃雲山事聞于朝大通三年勅建寺于雙檇間卽
今雙林寺也山多猛獸大士每齋竟輒持餘飯飼
之自是伏匿今名其處爲餒虎岩餘飯化爲石可
琢數珠是時有陶氏子資給大士甚勤因付囑之
自此石他日瞻汝子孫今惟此一家能琢他人效
之石乃穿裂舊傳大士每行道有七佛相隨如來
居前維摩居後歸寂之時東海徐陵爲撰塔志銘
至今存○又十五里爲蜀山高百丈下臨蜀墅塘
上有仙壇及陽春洞又十里爲葛仙山高一百五
十丈其巔爲雪峰嶺高八百丈又十里曰大寒山
山頂有池四時不竭春夏溢出爲瀑布泉又十里
曰來山高二百五十丈羣山遠來至此而止故名
山側有羊印石輿地紀勝云梁天監中西域嵩頭
陀自香山南行至金山江水大溢舟師莫肯載師
布傘水上持鐵魚磬截流而濟至來山立精舍名
來山寺○又二十里爲杏嶺高一百丈吳寧溪之
源出焉流至丹溪爲婆塘坑婆塘坑之水合流爲
小雙溪又合峴溪之水流至黃蒲潭入大溪○黃

藥山在縣北二十里一名黃盧尖下有網巖唐武德四年置網州以此巖名又二十五里有清潭山酥溪之源出焉流至丫口與深溪合流入豐江山頂有鷹嘴巖方臘亂時居民多避於此又有鷄栖山一名金峰山上有石屋北有降魔峰又三里曰龍祈山山之西有深溪西北流入浦江○九里潭在縣東南九里故名每風雨晦冥輒有鐘聲隱隱出潭中嘗有漁者捫鐘見之鐘傍有屋廬類庵廟然又十里有鐵嵒一名郭公山高峭峻拔山半有水簾下垂數十丈如匹練山頂夷曠百畝有三塢及三潭皆極深奧○又六里爲龍門山自山口循澗磬折而行過師姑潭石井坑登樓梯岩有平岡橫亘其上是爲龍門傍皆平壤民多耕桑其間絕頂兩峰對峙名雙玉峰南下繭嶺俯瞰深谷有澗水經其中西人畫溪溪上曰畫塢山溪流經其下注爲斗潭又二十里有夏山絕頂有湖曰上湖廣袤四丈深五尺○晏公類要云繭川城在縣西南三十里有繭川湖去縣西一百五十步週迴九里山川花木掩映如繡故名宋紹興間縣令董燿奏請爲放生池王忠文詩十里華州上年來足勝遊

雨花林下寺風柳驛邊樓漠漠芙蓉浦依依杜若
洲平生身外事應許付沙鷗○又二十里爲香山
其地產楓香木故名亦有香爐峰在山頂○又二
十里爲五雲山唐天寶間有五色雲彌漫峰頂故
名上有智忍巖五雲溪之源出焉流至梅塢口合
梅溪入於大溪又二十里有覆釜巖四隅孤絕石
芒峭發上有平壤土美可耕而山邃地僻迥非人
世○稠巖山在縣西北二十五里上有巖如屋巖
中石室深十餘丈廣數丈巖巒叢互故以稠稱晉
咸康中丹陽令葛洪棄官隱此○塚記云駱家塘
在縣東北唐初駱賓王居此賓王七歲能詩武后
時除臨海丞棄官去徐敬業討武則天賓王爲之
傳檄敬業敗賓王亡命不知所在今有墓在縣東
三十里上楓塘

永康縣

在府東南
一百十里

東陽記曰孫吳赤烏八年分烏傷之上浦立永康
縣按志城東有華溪源出密浦山城南有南溪源
出縉雲之土母山俱東流至縣城合流入郡城北
卽所謂永康港也其注華溪者爲雲溪酥溪及鶴
鳴桐琴諸溪宋章璣詩華溪釣隱誠自豪齊門操

瑟非吾曹綸竿百尺水雲渺鐵笛一聲山月高放
霍引尋紫芝洞得魚醉臥滄江濤黃塵滿地不歸
去萬里天風吹布袍○寰宇記云金勝山在南溪
上三里許昔有人得金豚于此俗訛豚字爲勝故
名其下有石鱉潭永康人入山遇大龜煮之不爛
卽此處按異苑永康有人入山遇一大龜束之歸
龜便能言曰游不良時爲君所得人甚恠之載上
吳王王命煮之焚柴萬車語猶如故諸葛恪命燃
老桑煮之立爛然湖州武康亦載之○又十里爲
石城山張氏土地記云永康縣南十四里有石城
山山際四圍岿岿如雉堞然昔黃帝曾遊此山所
謂三天子都者此其一也又進爲白雲山危峰百
丈延袤十餘里時有白雲繚繞其上相近有伏翼
嶺石岩中伏翼多棲之有潭曰英山潭其水清徹
潭上巖石嶄峙形狀英絕○又十五里爲絕塵山
高百餘丈其勢險巖出塵故名又五里有歷山高
一百丈周四十餘里其巔有田有井有潭皆以舜
名蓋以山名同於冀州之歷山也○石室山在縣
東南三十里高百餘丈緣崖而上南北二穴相通
可容數百人中有一石柱石龜又十里曰靈巖山高

四百餘丈周五里中有巖穴前後相通高丈餘廣
五尺深二十丈以形勝靈異故名明李暉石室詩
石室初從混沌分呀然一竅氣氤氳山僧慣住龜
鼈窟野老能穿虎豹羣行怪帽簷常礙蘚坐驚衣
袖忽生雲幾時更借禪床臥六月松聲絕頂聞○
峴山在縣東二十里高一百丈衆山排列狀如峴
首又十里有石翁山山上有石遙望如人坐號石
公傍一石如婦人號新婦岩蕭梁時以此山有王
氣詔令鑿之忽有雙白鶴飛鳴化爲真人乘霞而
去今此地名鶴鳴畝又十里爲龍窟山山之陽有
小空同洞宋陳亮讀書其中最高有方巖山高二
百丈四面如削駕飛橋石梯而登絕頂二巖相峙
爲關上有亭曰透關亭自亭而入地皆平行約數
百畝中有池其水清瑩不竭池側有井曰硯井井
後有岩高數仞岩下石深二丈廣數丈僧因構室
居之宋侍郎胡則讀書于此其別方崑詩云寓居
峰頂寺不覺度炎天山叟頻來約林僧與論禪虛
懷思往事宴坐息諸緣照像龕燈暗通宵磬韻傳
冥心資寂莫琢句極幽玄拾菌寒雲下烹茶翠竹
前遠陰臨嶽樹清響落岩泉僻徑無來客深秋足

亂蟬松風生井浪溪雨長苔錢自省隨浮世終難
住未年遍遊曾宛轉欲別重留連明日東西路依
依獨黯然○桃巖山與方巖相近高一百丈山石
赤白相間狀類桃花有洞可容千人絕頂小洞可
容二三十人又東曰壽山中有石洞高六尺廣五
丈前有石臺名兜率岩臺右有小石洞洞門懸瀑
布泉二派一從覆釜峰夾流而下一從桃花峰下
注岩石間濺沫如霧元黃潛桃岩詩立石平如削
飛雲近可梯莫窮千古勝但惜衆山低靈草經年
長珍禽隔樹啼人言舊朝士感事有留題○白眉
崑在縣東北五里有僧居之卽崑爲室中可容數
百人山腰有白石如眉故名○方物志云松化石
在縣東北延真觀續神仙傳道士馬湘字自然唐
建中元年至觀前指松樹曰此松已三千年矣當
化爲石至夕大風雨其松果化近觀松皆化爲石
陸龜蒙集永康地饒古松往往化爲石盤根大柯
文理曲折皆在卽此物也

武義縣

在府西南八十五里

唐書及元和郡縣志皆云天授二年分永康縣西
界置武義縣○志云湖山在縣西二里山有潭水

凌晨雲氣與則爲雨候與湖山相連者曰書臺山
唐執政舒元輿讀書於此○又十七里有大家山
大家溪之源出焉山南有新婦山二山相向每大
家出雲新婦山卽雨世傳晉張彥卿女出嫁累日
姑婦併亡其神各主一山故然又二里有雙巖自
山下迤邐而上五六里有二巖蔽于草莽國初金
華徐元吉剪闢之乃因石室以構禪院○白陽山
在縣東七里上有異石色隨時變歲豐則黃歉則
黑東陽山水記云晉阮遙集之弟妻劉伶之女並
好山水渡江來隱同時張彥卿爲永康令亦棲於
此又三里有小姬山山水記云山中有姬水溪舊
經云晉金談爲吳興太守辭疾隱此姬水流至縣
南三十里溪傍有山多產蘭菊因名菊姬山又五
里爲明招山阮孚墓在焉上有惠安寺躡屐亭宋
鞏豐詩千古高風挽不回故山花落又花開莫欺
亭畔蒼蒼蘚曾印高人屐齒來○白華山在縣南
四十里近山半里二石夾道若門歷此曲折險逕
至山巖中一石突起若蓮座昔有支大士居之名
大士庵又有劉巖一名金石巖巖石轟峻鑿石梯
以升巖頂前有一山陡削如屏名招聖峰後一山

金華府志卷之九
廓然石室深廣五十丈曰仙都壇昔有劉氏隱此
因改今名○八素山在縣北四十里相傳秦末有
八士從洛陽來棲隱於此冠履皆素因以名山而
姓名不傳下有八素溪流入金華界溪有八素潭
夏秋水溢旱則沙積漲露渡潭迤邐而上又有九
井潭嘗有善水者自潭遊渡攀崖而上遍歷九井
每山一曲有一井相去各里許云

浦江縣

在府東北一百二十里

寰宇記唐天寶十三載析義烏縣北部及蘭溪縣
東二鄉富陽縣二里置浦陽縣以縣南界有浦陽

浦爲名謝惠連詩昨發浦陽浦今宿浙江湄是也
說文水相入爲浦又水北曰浦此水北流入浙江
二水參錯故以浦名一名浦陽江本吳越三江之
一其水微而稱江者以其入海耳酈道元水經注
浦陽江導源烏傷縣東逕諸暨與泄溪合是也至
五代時錢鏐與楊行密爲仇凡屬地與楊同音者
悉奏改之而浦陽稱浦江○志云龍峰山在縣東
一里高三十丈上有三峰相屬環顧縣左又七里
爲仙華山一名仙姑山又名少女峰相傳軒轅少
女於此上升故名高一百五十丈上有五峰東溪

之源出焉中一峰與東峰尤極峻絕懸崖百仞有
穴深黑風從中出又二里爲湖山兩山對立江水
中流亦名湖山峽○寶掌山在縣北八里與仙華
山相近山前雙峰列峙沿澗奇石若虎豹狻猊鐘
鼎刀戟上下錯列復有懸巖湧出類翩躚飛舞之
狀亦名飛來峰峰下有泉甘冽唐貞觀中寶掌和
尚西域人生于周末來游東土至此岩下誦偈有
行盡支那四百州此中偏稱道人遊之句遂結茅
爲庵晏坐凡十七年一日屈指已一千七十二歲
語其徒惠雲曰吾將謝世矣端坐而化後惠雲居
東岩之下號伏虎禪師○又二十二里曰小孤山
巉巖險峻人不能到又十里曰大孤山峭削壁立
上銳下直無可攀援崑巒環伏映帶清溪○烏蜀
山在縣南三十里其山突然中起衆峰羅列梅溪
之源出焉流入蘭溪又南二十里爲大陽嶺高千
餘丈長十里浦江金華之界路也○芙蓉山在縣
東三十里一名香巖山白麟溪之源出焉宋鄭綺
家于此綺至孝母嗜溪水值旱對溪數仞不得泉
綺慟哭水爲湧出因名孝感泉自綺至國初已十
世同居凡二百四十餘年元至大間表其門是時

主家者名文嗣文嗣沒從弟大和繼之家畜兩馬
一出則一爲之不食人以爲孝感所致洪武初有
鄭淵鄭濂鄭濟皆賢二十六年遣官簡拔其家子
弟年二十以上者二十四人赴京選用○玄麓山
青蘿山皆距芙蓉山五里元至正三年金華宋濂
慕義門鄭氏之風徙家于此爲鄰築青蘿山房著
青蘿雜草嘗與鄭元觀玄麓山下飛泉因作飛泉
操書之巖石其辭曰飛泉兮瀏瀏洗耳固非兮胡
飲我牛覆謂我汗兮移波上流具人之形兮奈何
忘人之憂○又有東明山大澤中隱然突起元青
田尉邵德璋翫精舍于此以教族人傍有水一泓
曰靈淵淵之東百步許有泉冷然老梅橫蹲其上
曰梅花泉又五里有鷄冠山勢極高峻可俯瞰二
百里外相聯有三十六岡重巒複嶂前後相屬○
石牛山在東南三十五里呂東萊入越錄云山側
有池池中有石牛水涸則見又有康侯山一名官
巖高一百餘丈山半有穴若屋可容數人絕頂有
池深三四尺周二十五丈不隨雨旱增減○深梟
山在縣西南五十里重峰複嶺峭拔千仞其下溪
流清澈卽浦陽江源所出也

湯溪縣

在府西南五十五里

我朝成化六年郡守李嗣以金處衢三府界龍游之東金華之西蘭溪之南遂昌之北有湯溪其地僻遠阻山界水居民獷悍難治請置為縣從之遂以湯溪為名○九峰山在縣南十里高數百丈峰巒秀拔岩洞玲瓏望之若登天然唐徐安貞肄業於此石榻猶存安貞蘭谿人善五言舉神龍二年進士以文學稱又宋鄧去奢亦家此山下鄧少入道居處州茅山常有異鳥龍虎行庭若朝禮之狀綵雲鸞鶴迎之上昇朱約詩云亭亭九瓣擁青蓮中有飛來一道泉瑤草不知春幾度碧桃已老歲三千岩前月冷猿空嘯洞裏雲深鹿自眠莫道葛洪仙去遠至今丹竈尚依然○又其地有青峰山上有白石岩青峰庵鄭唯珍詩南山秀色鬱蒼蒼應有招提住上方石逕松高金落粉野塘花滿水生香捲簾樓外天光曉掛衲庭前露氣涼我有塵根消不盡願叅一指禪堂○福民山在縣東南四十里高數百餘丈林木蒼鬱山頂有廟層樓疊閣遠挹數百里又十里為香爐山狀若匡阜卓然雲表旁近眾峰環列競秀○澱江在縣北二十里

上接盈川下通蘭溪其水縈迴如澱故名明金實
詩鮫人宵織靈虛宮雙隨練帶光涵空玉梭飛殘
半鈎月千尺平鋪白如雪經烟緯霧迴暖紋東風
剪斷春無痕遠山飛嵐蘸新綠潛蛟吹濤鈿花簇
越羅蜀錦不勝裁夜夜蘭江展銀軸○又其地有
琳湖在縣北十五里郭如顛詩廿年不踏琳湖路
修竹依然舊日清醉後錯疑湘水上東風吹落鷓
鴒聲華亭張弼詩琳湖湖上草堂幽四面窓涵一
鑑秋軒冕紅塵飛不到竹床高枕對閒鷗

衢州府

在省城西
南六百里

領縣五

唐武德四年析婺州之西境置衢州元和志以州
有二衢山故名其地卽春秋之姑蔑秦爲太末縣
漢書注云太音闔李習之南來錄云自杭至常山
六百九十五里逆流多驚灘以竹索引船乃可上
也郡治據龜峰其西爲崢嶸嶺輿地紀勝云相傳
昔有柴宏屯兵于此後訛曰崢嶸然攷三國吳遣
征虜將軍鄭平以千人守崢嶸鎮則其名亦已久
唐孟郊詩疏鑿順高下臨構橫烟霞坐嘯郡齋肅
玩奇石路斜古樹浮綠氣高門結朱華始見崢嶸

狀仰止逾可嘉○郡治前爲小蛾眉峰唐乾符間
刺史季穀置砦龍山得二石長六尺許取置文會
閣宋淳化間郡守慎知禮移植之此積土爲峰後
遂訛傳爲郭璞墓紹聖中郡守孫賁發之因得此
石移置堂中宣和中郡守高至臨復移歸故處相
傳蛾眉山正壓郡治故設此以對之因名小蛾眉
○紀勝云龜峰堂在治內雙石堂在廳左卽孫賁
所建○雁序館在城西隅唐咸通中刺史趙璘與
弟處州刺史瓚會別之處○來月亭在郡圃蓮池
跨橋疊石築亭于上榜曰來月○雪竹軒在郡齋
爲一檻中檻種竹敲風擊雪音韻鏗然○雲山閣
在超化寺後城上雪齋趙子覺有詞云臨高閣亂
山平野煙光薄煙光薄棲鷗歸後暮天吹角斷香
殘酒情懷惡西風赳赳梧桐落梧桐落又還秋也
又還寂寞○獨清堂在殷浩廟側清陰堂在南禪
寺記云俱趙清獻舊遊按史殷浩字清源陳郡人
晉建元間北伐爲姚襄所敗廢爲庶人徙居信安
口無怨言其甥韓康伯隨至經歲還都送渚側誦
曹顏遠詩富貴他人合貧賤親戚離因泣下後代
名其所居曰殷墻因避廟諱改曰慶墻久之爲龍

壽寺在治南六里○宋趙抃字閱道三衢人其所居在城北孝弟里抃喪繼母與弟拊廬墓縣令過照榜其里曰孝弟有高齋清獻歸老時作又有濯纓逸老水月三亭蘇軾寄題趙閱道高齋見公奔走謂公勞聞公引退云公高公心底處有高下夢幻去來隨所遭公年四十已得道俗緣未盡除伊臯功名富貴俱逆旅黃金知繫何人袍超然已了一大事掛冠而去真秋毫坐看猿猱落且網兩手未肯置所操乃知賢達與愚陋豈啻相去九牛毛長松百尺不自覺企而羨者蓬與蒿我欲羸糧往問道未應舉擘辭盧敖趙抃自題高齋軒外長溪溪外山捲簾空曠水雲間高齋有問如何樂清夜安眠白晝閒

西安縣

附郭

宋教授衛玠信安志畧云

後漢初平三年分太末立新安縣晉太康七年以弘農有新安故改爲信安唐末錢鏐割據因改今名○按志信安溪源出開化之百濟嶺東入縣界去城西二里亦名西溪與定陽溪合定陽溪一名東溪源出處州之周公原歷縣東十五里鷄鳴山下合信安溪而柘溪烏溪石碇溪馬厓溪儻溪後

溪之水皆滙焉又折而北五里溪中有石高丈餘水漲不沒名浮石潭唐白樂天詩浮石潭邊停五馬宋趙抃詩潭石江心徹底清皆指此○紀勝云衢故城有三一在驛馬橋之南唐末黃巢之亂設寨于此一在開元寺北疑是定陽故城一在章戴之白石疑是穀州故城也今城不知起自何代然攷宋史方臘陷衢州州守高至臨築龜峰城則建設當在宣和年間○郡城門有六其北曰永清卽古浮石門也大西門曰航遠紀勝云捲雪亭在航遠門外俗謂之水亭門○大南門曰通遠舊名禮

賢以門直招賢渡也渡在城南三十里宋陸游過此有詩老馬骨巉然虺虺不受鞭行人爭晚渡歸鳥破秋煙湖海淒涼地風霜搖落天吾生半行路搔首送流年○小南門曰清輝今名通仙以城東南俱有仙山其路相通也仙崑在城東二十里我太祖高皇帝兵下江西過此御書仙崑洞天四字刻于石○爛柯山在城南二十里舊名石室道書謂青霞第八洞天晉王質入山伐木見二童子奕棋質置斧而觀童子與質一物如棗核食之不饑局終斧柯已爛故名爛柯山唐劉迥詩四首白雲

引策杖苔徑誰往還漸見松樹偃時聞鳥聲閒豁
然暄氛盡獨對萬重山又石橋架絕壑蒼翠橫鳥
道憑檻雲脚下頽陽日猶蚤霓裳倘一遇千載長
不老又靈境偶一尋洞天碧雲上爛柯有遺跡羽
客何由訪日暮悵欲還晴煙滿千嶂又繩床宴坐
久石窟絕行跡能以人代中途將人代隔白雲風
颺飛非欲待歸客孟郊前題仙界一日內人間千
歲窮雙棋未變局萬物皆爲空樵客返歸路斧柯
爛從風惟餘石橋在猶自凌丹虹宋錢顛詩春郊
雜選擁紅旌共訪仙蹤嘯傲行雲逕直從深崦入

石梁宛在半空橫巖邊瑤浦新開出洞裏芝田舊
種成羽客一枰無復見青山留得爛柯名陸游詩
藍輿訪客過仙村千載空遺一局存曳杖不妨呼
小友還家便恐見來孫林巒峭絕秋容瘦樓堞參
差暮氣昏酒美魚肥吾事畢茅菴那得住雲根○
縣東十五里有彭湖廣數十丈延袤五里相傳以
爲中通石室蓋昔本里人彭氏所居忽一夕竈下
產雙石筍斲之因陷成湖故名○又十五里爲塘
山高百仞其頂有塘深不可測中有漢大乘寺基
址及石巖魚絕大趙抃詩直到巢峰最上頭旋磨

崖石著詩留重來轉覺寒松老三十六年前舊遊
○又五里爲烏巨山東西兩山連亘其西盤鬱雄
秀尤稱奇絕自麓至巔可六七里趙閱道詩烏巨
東西氣候秋子湖岡隴暮雲浮欲觀古佛叢林地
只用凭欄一舉頭○與烏巨相連者曰王貴山貴
乃質之弟也相傳亦于此山仙去其上有東西寺
○又十里爲鵝籠山一名繡峰上有三塢一池皆
稱奧區與鵝籠相連者曰紫薇山一名迷茨中有
懸崖滴水東陽記云峰巒際天邈絕羣嶺者也○
鵝籠之側爲九仙崑狀如屏宸當其中凹處撐柱
上下爲屋數間唐龍游徐安貞舉貞元二年進士
以侍郎歸隱于此修真恒苦無水飛騰出汲日凡
數四亦名侍郎崑○仙崑繡峰之間有翠微山高
千餘丈上有平田數十畝宋招討使王安所居○
與九仙岩對峙者爲師姑巖巖下可容數百人宋
有比丘尼曰劉鐵磨者嘗叅于湖禪師師曰汝是
劉鐵磨乎曰不敢師曰左轉右轉尼曰和尚莫顛
倒因有悟其後尼乃倒豎化此巖中○遊仙崑者
過安仁渡宋楊萬里詩明發山溪一雨餘榻來暑
氣半分無行人道是三衢遠穩掛東風十幅蒲○

巖山在城西十里四面壁立視衆山獨高絕頂平
曠數十畝中有石井冬夏不竭又十里爲砭石山
平地拔起五峰下臨溪水昔有隱者居焉夜見光
怪出石上跡之得古劍戟二事○又二十里爲烏
石山延袤十里高二百五十仞巨石周匝如城又
有石門中蓄水田不旱唐龍紀初通濟大師結茅
於此名福應院至宋咸平二年住山凡一百一十
餘年師姑圓寂不知其壽宋岳飛題名于石云岳
飛奉旨趨闕復如江右假宿幽巖遊上方覽山川
之勝志期爲國速欲掃平黠虜恢復輿圖迎二聖
於沙漠輔聖主無疆之休紹興二年十月初三日
題張浚題云紹興丙寅清河張浚過此聽顏師鼓
琴而去唐翁洮詩東風吹老越山薇步上烏峰送
夕暉林外月明風虎嘯巖頭雲送雨龍歸聽琴慨
慷懷張浚題石英忠仰岳飛一曲陽春追往事牛
山何必泪沾衣○響谷山在縣南二十二里崖壁
峭立水環其趾崖半有穴風噓則鳴○又十八里
爲疊石山其石疊出如層累狀中有崑洞名曰仙
游可坐十客○又三十五里爲爵豆山山出銀礦
品色煥潔唐元和四年閉塞不開○項山在縣北

四十里最爲陡峻其內有桐山旁列諸峰勢如奔馬項羽廟在焉有賀蘭進明碑○又十里爲葉蓬山宋咸平初有盧杜二禪師至此里人李鼎留之栖止日使人饋糧問其所欲五年不懈偶失問三日往視則皆瞑目据鈕相對而逝○又十里爲太真洞門廣五丈深十丈內有玉泉水亦名玉泉洞與之相通者又有三洞一曰靈龜洞今名太乙洞門高丈餘中廣五丈詰曲里許至石龜塘僅廣二尺中有石龜具青黃白三色歲旱入洞探而致禱得白則不雨一曰碧雲洞舊名葱嶺其下有潭廣

三丈一曰朝陽洞門三尺其中石澗瀧流莫測深廣○縣南又有龜龜洞相傳昔彭大佛者棄妻子栖林泉寺傾貲以贍其徒忽於小徑中間樂聲跡其路六七里有宮室仙人采女坐堂上酒殽盛設遂請大佛應供大以未着七條衣倉皇辭避堂上傳聲送大佛從後門出旣出失其所在今惟綫溜落巖隙流入洞前石井不涸每陰雨猶聞鐘鼓聲○鳳山在縣北八十里芝溪之源出焉上極平曠可治田圃又十里爲白塔洞外狹中寬至第二層有龍潭深不可測日夜水滴凝成白鵝管石其形

似塔故名○塚廟記云晉毛璩墓在縣南一里璩乃寶之孫也本傳云自寶至璩三世皆擁旌節○鄭平墓在縣北三里卽戍崢嶸鎮者咸熙元年以功遷左光祿大夫新昌郡公食邑信安年九十三○趙清獻墓在縣東四十五里欽化鄉蘇軾銘清獻之子屺執父喪而甘露降於墓木相傳景定間有林存者爲潭州帥罷歸道衢調千夫荷擔經墓旁疲甚因相與語清獻公一琴一鶴那有許耶或聞之題詩驛舍云千夫荷擔在山阿膏血如何有許多不若扁舟竟歸去休從清獻墓前過

龍游縣

在府城西七十里

舊唐書龍丘縣注云本秦太末縣貞觀八年置以縣東四十里龍丘山爲名○龍丘山有九石特秀林表其色丹白遠望若芙蓉故又名芙蓉山漢龍丘萇隱居于此與嚴子陵友善王莽連辟不就更始初任延爲會稽都尉遣功曹奉謁使者相望於道歲餘始詣府拜議曹祭酒年百歲乃卒山中有三壘巖穴外如牕牖中有石床唐徐安貞讀書處南齊書云太末徐伯珍宅南有高山班固謂之九巖山安貞蓋其裔也寰宇記云吳越錢鏐惡丘之

名故更名龍游○鷄鳴山在縣南三里每五鼓有鷄鳴山中風雨不渝宋嘉祐末邑人呂大防講學于此一日見有鷄鳴棘叢張羅捕之得白金千鎰輸之官而已不染其後三子皆貴又南十里曰岑山奇峰森列金華望之適當其前一名婺女照臺○又二十五里爲白石山東陽記云太末南有圓石聳二十餘丈後漢方士過呵之石因半折碎者尚存其色純白唐初以白石名縣貞觀八年與穀州並廢○與白石相連者曰靈山舊名徐山山下有溪曰靈山港源發處州遂昌縣界經此山下繞縣城南復折而東達於澱溪溪外有徐偃王墓及廟唐韓愈作碑略云徐偃王當國出於仁義時周穆王無道得八龍騎之西遊同王母宴於瑤池之上歌謳忘歸諸侯爭辯質於徐之庭者三十六國穆王恐乃長驅而歸伐徐徐不忍鬪其民北走彭城百姓從而歸之偃王死民號其山爲徐山衢州故會稽太末也民多徐氏支縣龍丘有偃王廟或曰偃王之逃不之彭城之越城棄王几研於會稽之水云○按澱溪在縣北五里合西安江山常山之水交錯如羅紋故名其上有姑篾城左傳魯哀

公十三年越伐吳吳王孫彌庸見姑篾之旗杜預注姑篾越地在太末縣是也治內東華山有姑篾子墓宋慶元間爲人所發古物充牣隨即灰散惟數瓦缶不壞水滿其中唐孟郊姑篾城詩勁越旣成土強吳亦爲墟金風一已被茲邑信平居撫俗觀舊跡行春布新書興亡竟何在綿歎空躊躇陳愷前題姑篾空城暮山川向不同草黃秋少雨樹暗晚多風流水中分郭飛橋下飲虹未須追往事回首送冥鴻王藻前題石馬金輿識故宮斷碑漫滅覆杉松誰憐邠國干戈地空有塗山玉帛蹤芳草滿庭留晚色斷雲連野歛春容中原逐鹿歸狙詐此意悠悠委暮鐘○縣東二十五里有築溪相傳徐偃王避難于此樂其山水築室山居因名○築溪源出松陽大方山合馬報溪入穀溪穀溪之旁有巖曰穀坡廣五丈四尺深三丈唐武德初置穀州于其上今廢有穀坡亭遺址由穀坡巖北又三十五里有二巖相距一曰白佛巖廣五丈四尺深四丈七尺中有佛堂其地險峻人跡罕至一曰烏石巖廣五丈深三丈有水下滴經年不竭其高可望數百里宋汪佖穀坡亭詩波紋端與穀紋同

正倚欄干想像中更被輕舸橫載去斜陽染得半
江紅徐慥前題穀坡亭下晚維舟縹緲烟屏翠欲
流忽地驚雷過溪面連天吹雪下山頭汀洲瑟縮
藏鷗鷺涯涘瀰漫失馬牛自笑勞生日蒼髮不知
來往竟何求○石壁潭在縣東三十五里唐僧貫
休建石壁院于此杜荀鶴詩石壁早聞僧說好今
來偏與我相宜有山有水堪吟處無雨無風見景
時漁父晚船分浦釣牧童寒笛倚牛吹畫工畫得
從他畫畫得如何更賦詩○野湖墩在縣西二十
里廣環二十餘丈高十丈獨立江濱花卉蒙茸與
野湖相望者曰筍墩圓石如筍卓立溪中故名○
五百人湖在縣東北三十里溉田五百餘頃異苑
云昔有五百人入此取魚先祈湖神乞靈其夜夢
神云竭湖當如禱若見異必勿殺得銅缶亦勿廢
及決水果得異魚遂剖食得缶亦廢之已而水暴
至五百人俱沒故名

常山縣

在府西
八十里

東漢初平四年置定陽縣後廢今縣有定陽鄉三
岡遺跡猶存元和郡縣志云唐咸亨五年分信安
西界置今縣以東有常山爲名山頂有湖廣數畝

中有巨魚又名湖山其地在今城東四十里常山鄉尚有街陌通三衢○三衢山在縣北三十五里昔有洪水暴出其支派分爲三道故名而州名亦取于此宋錢愷記略云峭峰奇石聳豐平地玲瓏巖峯紺碧一色蟠屈夭矯槎牙鋒銳翼而飛拱而植不可槩舉畫史莫能狀也其巖洞疑靈仙所宅名以碧玉中有石室旁通二門偃而入宛若壺中鐘乳林立擊之鏘然花卉若生成題爲翠巖上有巨石橫偃榜曰玉龍○與三衢相近曰容車山東陽志云山上有石周迴二百步高三百丈有賣薪者每五鼓適市過之如聞梵唄聲後十年山嶺破岡湧起一石僧跏趺而坐衆大驚異因建石僧院以祠之宋紹興間僉書樞密院趙鼎以諍和議不協解政寓縣建獨往亭於此○其地有石門山石徑僅容一人下臨大溪其巔有竅每旦雲出其中東馳則雨西則晴旁有趙公巖石洞可容百人以宋趙抃嘗遊故名○又有攝龍洞洞前石竇常乾禱雨則滲潤須臾滿溢有異物如蛇蜴魚鰕之類與水注篋而歸雲雨隨至及送還洞口則篋已空若攝而去故名○紀勝云永年寺在容車山之麓

茂林脩竹斷崖寒溜勝槩爲諸刹之冠趙公鼎范公冲與僧了空相厚善昕夕過從里人畫三老圖以紀之其後侍讀范公卒塋于此○白龍洞在城西里許其地草木蒙密一夕大風雨有白龍凌空而翔及風雨息視前蒙密處乃有二洞相承一當山腹偃躬而入莫窮其奧一在山趾澗溜潺潺有聲宋徐以道詩靈仙窟宅不多見車馬往來成再遊後洞白雲前洞出上池紅葉下池流水花照眼明金鯽石髮藏春護玉虬邂逅尚青遊子眼棲遲遮白老僧頭○禹跡洞在縣南十里五代唐長興間刺史陸仁粲有石刻述故老言唐天祐初郡守曹輔以歲旱遣衙將往汲洞中泉率僚佐迎致泉變黃黑有雲縈之少頃雨大至又南七里有靈龜洞先是山前數聞音樂聲俄而山腰寶石上有蟠龍清流噴薄巨石盤桓有天成塔高丈餘石龜三其像逼真○金川在縣北一里其水最大可勝三百斛舟又名馬金溪源發開化之金錢山故川以金名信安志求其說不得妄謂昔有仙人飲此水吐金者非也水自南來八十里繞縣城東復折而南五十里入西安界達西溪○石磴溪在縣南

源出玉山沿流注于金川溪中花石如疊中有石山○斗潭在縣北二十里泓深莫測相傳乃龍窟也旱則雩之○又十五里之石門鄉爲丞相趙鼎墓鼎解州聞喜人南渡後寓居三衢兩相高宗爲中興名佐後貶吉陽軍卒歸葬于此初鼎喪過袁州通判汪應辰爲文祭之曰惟公兩登上宰皆值艱危之時一斥南荒遂爲生死之別事已定於蓋棺恩特容于歸骨云云

江山縣

在府西南七十五里

唐武德四年分信安縣之南川置湏江縣以南有

湏江爲名五代時錢鏐改爲江山蓋指江郎山也江郎山在縣南五十里高六百尋一名金純一名湏郎東陽記云金純山有三峰皆數百尺色丹奪目不可仰視杜祐通典云湏郎山發地如筍有三峰昔江姓三兄弟登其巔因化爲石山頂有池生碧蓮金鯽人跡罕至山半有巖危石空懸中可結廬唐開明禪師儀宴者趺坐祠旁叢棘間鵲巢其頂葉沒其膝有郡守謁祠見之是時師年已五十三始爲祝髮卓庵於此有虎跑泉以供其飲寰宇記云晉時山下人湛蒲其子仕洛遭永嘉之亂不

得歸蒲日禱于三石之靈一日蒲子出洛水邊見
有三少年告以思歸少年使之閉眼入車中但聞
去如疾風俄頃間乃從空墮入家園唐白居易詩
林慮雙童長不食江郎三子夢還家安得此身生
羽翼與君來往醉煙霞邵康詩捫蘿躡石步峻嶒
費盡平生脚力登天上樓臺山上寺雲邊鐘鼓月
邊僧四時爽氣來無際一點紅塵到不能珍重開
明老尊者祖堂千古耀禪燈○輿地紀勝云雙溪
泉在縣市中有雙溪堂爲負邑佳處○西山去縣
一里峰巒秀拔下有涓泉又名梅花泉宋徐復殷
家于此殷歷官左庶子言事不合遽退理宗賜克
齋二字以旌之又里許曰騎石山山有目連洞明
淨幽曠如屋一線之泉鳴聲不絕舊傳目犍連脩
行於此宋政和間山下掘得青提夫碑乃目連之
母也無名氏西山詩云江城樓閣闕嗟峨如此隨
風燕雀何古樹望中松樹少好花開處杏花多徐
殷舊宅僧爲主褚氏閒庭鶴占坡欲問廢興今古
事青山無語野樵歌○景星山高四十五丈與騎
石山相望初名突星宋紹興間改今名山之西有
烟蘿洞可容二十人怪石奇崛其色紺碧舊傳有

烟蘿子隱此宋汪大猷辛棄疾皆有題名劉子暈
景星山詩山頭孤立玉娉婷天上何年墜景星四
面萬峰非不峻如何只是此山青吳仲烟蘿洞詩
石上白雲深洞口桃花碧丹成人不來千歲空留
跡曹直重遊烟蘿洞遊年少日刻石記重來仙
客渺何許碧桃依舊開○航埠山在縣東一里山
勢逶迤其陽有鹿頭溪噴崖漱石晝夜喧豗有鹿
溪航渡宋韓駒詩縣郭連青野人家蔽綠蘿地偏
春事少山迥夕陽多暗水披崖出扁舟掠岸過傳
聲細扶柁吾老怯風波辛棄疾詩草稍出水已無
多村路彌漫奈雨何水底有橋橋有穴只今平地
怕風波又斷崖老樹互撐拄白水綠畦相灌輸安
得溪南一丘壑放艇畫作歸來圖陸游鹿溪渡詩
堪笑行人日日忙又扶衰病過浮梁灘流急處水
禽下桑葉空時村酒香枯枿敢懷貪雨露饑鳥自
閱犯風霜宦途商畧無安處早晚歸耕剡曲旁○
大嶺洞在縣西二十里懸石如屋又蟠屈如龍狀
下有石田秉炬而入愈入愈深杳不可窮又二十
五里爲馬鞍山宋逸平先生徐存建南塘書院學
徒千餘人秦檜欲識之不能得朱晦庵少時嘗與

講論及逸平沒晦庵往吊而書院爲毛氏墓田因賦詩曰不到南塘久重來二十年山如龜背擁地與馬鞍連徐子舊書址毛公新墓田青松似相識無語重悽然○翁巖山在縣北二十里巖石層列有一甲者可坐十餘人前臨一池甚潔有嵌空處偃而入爲洞六七所洞中石佛石乳石田至者如聽龍吟虎嘯輒怖欲出是名左坑洞又五里有湖山高百丈上一石窟深而黑神龍居之禱雨或雲霧飛騰雨卽隨至○筋竹山在縣西北二十里高五十丈其中有潭深晦莫測溢則旱淺則豐土人以此卜歲唐貞元初番陽女子詹妙容脩真于此楮衣木食騰空而逝後名爲登高巖○鷲籠山在縣東南四十里上有龍湫禱雨輒應宋宣和七年封其神爲嘉澤侯有水簾在仙居寺前發於山巔緣崖而下若輕綃高掛柳屯田爲之記王安石詩云淙淙萬音落石巔皎皎一派當簷前清風高吹鸞鳳唳白日下照蛟龍涎浮雲裝額自能捲缺月琢鈎相與懸朱門試問幽人價翡翠鮫綃不值錢○又二十里爲羅漢洞洞口僅容一人不足回旋輿地紀勝云有施僧供者忽一僧自言我羅漢院

僧也受供已脫隻履置洞口而入不復見履跡猶存又有濟井潭形方而深外限橫石舊傳有樵者溺已三日忽從水中出自言入見大官府有白鬚者居之命一鬼吏送還宋紹興五年投鐵符其中忽大雷電風濤四起湧一青石方廣丈餘○步虛山在縣南十五里山巔有壇乃羽士步虛之所又十里爲霍鳴山山頂有泉泉傍時聞鶴鳴故名與鶴鳴相並者爲徐王山三峰秀峙東趾有插衙塢相傳徐偃王嘗駐兵於此山有青雲洞宋乾道間里人鑿石偶得其穴綵屬橫亘蛻骨絕多洞旁一石林立扣之有聲稍進惟石蜿蜒繼以至穴僅尺餘莫可窮矣○又十里卽徐山山下人多徐姓故名近東爲瞻巖山有巖可容數十人其巔又有鷓巖高百餘丈可望衢城巖前夷曠亦可坐數十人下有覆螺洞唐時比丘入定於此至宋大觀中忽起不知所之因建聖僧庵於洞前○又六十里爲浮蓋山上有仙洞洞內石壁雙峙上通一罅徑僅容身可數十步始得廣處有仙人碁局泉竇冰滑餘石齒齒如屏如筍上有真紅桃花而不實洞旁有溫峰巖石倒垂中有石嘴如鷄味有泉出焉○

縣界之極南者曰仙霞嶺高三百六十級凡二十八曲長二十里唐書黃巢傳巢破饒信衢等州因刊山開道七百餘里直趨建州卽仙霞七嶺是也宋史浩帥閩始募人斃以石路又有箬山高出仙霞之上霽景可望衢州城陸游仙霞嶺詩吾生真是一枯蓬行徧人間路未窮暫聽朝鷄雙闕下又騎羸馬萬山中重裘不敵晨霜力老木爭號夜谷風切勿重尋散關夢朱顏頃改壯圖空趙汝騰詩雞鳴秣馬度仙霞鳥道迢迢去望賒暗水盡從空澗落好山剛被暝雲遮○其相近者曰大竿嶺北趨婺州南通七閩西抵廣信昔常監竿于嶺上故名去大竿嶺二十里有小竿嶺一名泉山高一百五十丈週迴數百里皆高崖深谷漢書朱買臣言東越王居保泉山一人守險千人不得上者此山是也今閩之福州亦有泉山乃在闌闌中晉江亦有泉山不足保障且至此二郡其險已過守之何爲故泉山以此嶺爲是○輿地碑目縣南相亭西有巨石雄峙路縈如帶峻不可陟昔有碑云六石大悲幽栖之所又三十里溪潭上有石方二丈餘中坎如臼徑二尺亦有鐫字○縣北十五里地名

白渡之國泰寺舊有祝欽明碑其墓亦在焉欽明
京兆人貶刺饒州葬此登真巖記云欽明嘗與其
孫洪來遊○保安院在縣東南布政鄉有吳越國
王帖墨本猶在○萃賢亭宋邑人周頴建在禮賢
鎮王安石蔡襄歐陽修王安國范鎮梅堯臣吳光
韓維韓絳王祺石楊休蘓舜欽劉湜蕭公才李太
臨吳宗復邵必李際曾固皇甫澄余藻張大有皆
有留題歐陽永叔詩云君家富山水占勝作高亭
坐聽溪流響能令醉客醒陽生群木秀寒入亂峰
青吾子東南美人賢益地靈

開化縣

在府西北
二百里

宋乾德四年吳越錢鏐置開化場於常山西境太
平興國三年鏐納土六年以其地置縣爰從開化
之名○縣學內七賢堂祀唐魏暮宋趙抃江景房
程俱鄒補之趙汝標魏亨中也元至正間縣令趙
起巖典學事程衛按圖志建○卧佛山在縣西七
十步五代時有二僧結茅於山之東其一常夜出
人見其有秉燭前導者其一夜卧常有蛇蜿蜒同
榻後皆化去宋皇祐間建靈山寺而二僧所居處
若現神光其上有翼然亭陸巖川詩云山南山北

倚欄杆面面芙蓉眼界寬吹徹玉簫驚去鳳修成
寶扇憶乘鸞放開月色層冰見歛却烟光列翠寒
路轉峰迴泉石上人人便作醉翁看○金錢山在
治東百步世傳金錢二道人煉丹于此故名宋有
江天然居焉其二子皆中神童科建月波臺於山
北又一里有塔山一名文筆峰朱仲晦月波臺詩
潺潺流水注回塘中作平臺受晚涼四面不通車
馬跡一樽聊飲芰荷香韓公無復吟花鳥楚客何
妨賦葑房少待須臾更清徹月華零露洗厓床元
蔚彥明金錢山詩亭亭金錢山地僻境逾靜不見

煉藥人空遺石壇井風勁鶴唳清露重丹光冷長
嘯振枯木天風吹鬢影○鍾山在治北里許一名
覆釜山金溪流其下溪有二源一出馬金嶺經九
里巒坏石柱源一出百際嶺經松陽源達馬金嶺
合流爲馬金溪西南流四十里經此山下環縣治
復東南流達華埠始容小舟○蟠桃山在縣東北
五里石壁峻立山徑縈紆處處種桃故名蔚彥明
詩朝來烟霞深亭午始見天遠近桃杏村高下山
坡田飛湍激雷雨老樹藏雲烟相逢荷鋤翁疑是
武陵仙○臺石山在縣北十里高三十餘丈山之

東有臺石懸厓瞰溪嶙峋欲墮○烏白二巖俱在
縣南十五里二巖對峙相去可二里烏巖廣三十
餘丈嵌空奇恠中平可居白崖下有小潭其深叵
測又十里爲烏泥嶺華川遶其下宋紹興間少卿
江緯築室于此公姪少虞齊漢從學于公時踵門
而至者如汪藻程俱李處權趙子畫七人綽有文
名後皆擢科顯仕時人指爲文中虎遂扁其堂曰
七虎堂○王母山在縣東十五里山高而銳中有
龍湫又十里有雅金嶺抵常山之路山勢壁立山
半亦有龍湫名攝龍洞○天童八仙山在縣北四
十里先是劉宋道士鄧去奢隱于處州卯山石下
得張天師印劔至唐乾符間復居于此感天童八
仙下降因以名山宋有道士王自然亦棄家修煉
于此有道行能致雷雨元祐間卽其所居建玉霄
宮初縣前池多蛙譙樓多蚊縣令請自然驅之遂
絕至今猶然陸容玉霄宮詩假息黃冠榻山窓月
已斜香分薰被火花落護燈紗露草翻巢鶴風枝
警宿鴉濟人吾有術無暇問丹砂花潤生詩雨夜
雲房借榻眠絮衾無夢竹風顛衣不待鐘催着
行在荒鷄未唱前○宋村巖在縣南四十五里有

石人石龍水出龍口不絕下有石臺承之元徐子
改詩礨砑紫雲窟鏗錡神鼓石機杼有時鳴雷電
常纛纛下方久旱嘆斯民亦孔亟何當作霖雨枯
槁回春碧○西巖在縣北六十里廣五丈深不可
測中有三竅怪石萬狀又十里有雲霧巖廣七尺
中有龍湫其水泓深○石耳山在縣西八十里周
圍三百里與婺源德興共界下有石龍巖巨石橫
亘如屋嵌空可二丈有龍湫深入無際又二十里
曰古田山外高十五里中有田百畝田畔有龍湫
侵晨有雲一縷浮空而出所向之方輒雨○馬厓
溪在縣東十五里發源白馬山下合大駛小駛二
澗西南二十五里至常山境注于金溪○聲口溪
在縣西二十里東南流十五里入金溪又西十里
曰池淮溪溪有两源一出歛嶺一出大溶嶺東南
注於聲口○馬溪之上有桂巖閣五代時侍御江
景房卜築于此居前有山壁立數十仞中有秋香
一本自石罅出婆娑掩映與巖相對峙宋紹興間
七世孫溥構閣于巖前而勝始備○白鰕池在縣
北三十里宋趙抃鎮蜀以白鰕遺余仁合仁合放
之池中其後生息不絕有求而他畜者鰕色輒變

遇旱水涸絕而復有○塚記云相塢在縣西一里
舊傳唐魏鄭公冢冢也或以爲魏暮所葬畊者往
往于其地得古噐○徐氏拜掃壇在縣北一里山
坡有墟墓六七內兩墓高一仞有半磚上刻唐貞
觀二十二年戊申字相傳李世勣兄弟所葬後削
籍爲徐故世稱徐氏拜壇○錢王塚在雲臺鄉距
縣一百三十里相傳吳越王祖錢氏微時爲人負
擔至此其主人曰此水九曲列岫如屏葬者子孫
當興因取枯竹標識明日令錢往視竹已生根遂
伐去而給其主以失所在潛以父母骨葬之後果
封王今猶有倒生藤蔓根下垂掃墓如掃云

嚴州府

在省城西領縣五

東漢末吳大帝立新都郡治始新縣在今淳安縣西六十里都督山下之威安鎮晉武帝改名新安郡隋仁壽三年廢郡而立睦州以內外輯睦為義煬帝廢州而立遂安郡唐武德四年又以桐廬分水建德三縣立嚴州取嚴子陵為名武后時移治建德縣即今所也宋宣和元年以太宗嘗為睦州防禦使因陞為建德軍我明初曰建安府尋改今名○郡廳壁記有三其一唐刺史李道古撰其一宋知州田錫撰其一將作監丞刁衍撰○高風

堂記在大廳東宋范文正撰刻仲淹以明道中守
茲郡登樓賦詩有瀟灑桐廬郡十首今錄其七云
瀟灑桐廬郡烏龍山靄中使君無一事心與白雲
空又瀟灑桐廬郡開軒卽解顏勞生一何苦日日
靄青山又瀟灑桐廬郡全家長道情不關歌舞事
繞舍石泉聲又瀟灑桐廬郡春山半是茶輕雷應
好事驚起雨前茅又瀟灑桐廬郡家家竹引泉令
人思杜牧無處不潺湲又瀟灑桐廬郡千家起畫
樓相呼採蓮去更上木蘭舟又瀟灑桐廬郡清潭
百尺餘溪翁應有道所得是嘉魚○思范亭記邑

人胡拱辰撰畧曰亭舊名竹閣出郡城小西門未
一里折而之北有山如几當几之中爲能仁寺右
偏爲資福寺能仁寺之南偏乃竹閣也宋明道二
年范公自右司諫來守是邦日喜登焉後人乃更
名曰思范近日僧道存掘地得石碑上刻二詩其
一云僧閣倚寒竹幽襟聊一開清風曾未足明月
可重來晚意烟垂草秋姿露滴苔佳賓何以竚雲
瑟與霞盃末云鎮江軍節度使推官阮逸題其一
云竹閣寒相倚雲牕晚共開閒身方外去幽意靜
中來聲響風隨籜陰移日上苔遲留更清夜待月

露盈杯末云治平二年十月尚書知郡事劉述書
置于思范亭○環溪亭在城內唐方干詩為是仙
家登望處風光便似武陵春闌花半落猶迷蝶白
鳥雙飛不避人樹影與餘侵枕簟荷香坐久着衣
巾暫來此地非多日明主那容借寇恂○千峰榭
在治東北隅跨子城上方干詩云豈知平地似天
台朱戶深沈別徑開曳響露蟬穿樹去斜行沙鳥
向池來隼中早月當琴榻墻上秋山入酒盃何事
此中如世外應知羊祜是仙才右二首蓋贈睦州
呂郎中作也○陵仙角在子城西俗傳為唐刺史

康希仙登昇之所○宋新定驛舊在州南門外謂
之行衙即多慶園舊址○宋都會在子城東門外
街北○宋文宣王廟碑雍熙三年知州田錫撰○
宋梓潼廟記吏部尚書葉夢鼎撰○城隍廟碑唐
刺史呂述撰開成五年立石○韓富文范四公帖
明道東坡二先生訓語蘓公簡鄉飲詩陸放翁詩
帖俱在學宮○陸偁爾雅新義二十卷其會孫子
適刻于嚴

建德縣附郭

吳黃武四年分富春縣地立建德縣甘露元年孫
韶于水濱得大鼎進之吳後主因改年號曰寶鼎

封韶建德侯○唐孟浩然宿建德江詩山暝聽猿
愁滄江夜急流風鳴兩岸葉月照一孤舟建德非
吾土維揚憶舊遊還將兩行泪遠寄海西頭按志
東陽江在縣東南二里來自金華界至此與歙港
合流東入浙江其歙港卽建德江也又四十里爲
三河潭潭水逆流而上兩旁順流而下故曰三河
唐置三河戍于此○西湖在縣西南廣袤五百四
十二丈中有寶華洲又六十里有聖湖中有白沙
洲俱限不與江通碑曰云西湖放生池記在湖心
法言寺宋紹興年朝奉大夫王管洪州玉隆觀姜

師中撰○圖經烏龍山在縣北三里高六百丈周
一百六十里郡之鎮山也其巔有二池一清一濁
俗名聖水池傍有烏龍嶺嶺有三灣九曲其水東
注曰玉泉宋趙抃詩泉石淙淙瀉百尋群峰環翠
起春林危巔召雨雲先作不負蒼生望歲心碑目
云烏龍山有道先生許公碑唐貞觀十一年江夏
李師尚撰許公者羽士也歿後其徒以有道私謚
之云○高峰山在城東五里雙峰峭聳與南山相
望新安江遶其西南東流合婺水以入浙江唐李
嘉祐詩建德潮已盡新安江又分是也貞元中有

僧曰少康者乞食睦州城中每得錢卽誘小兒念佛號一聲與以一錢因於高峰建道場集衆念佛衆咸見佛出康口中坐化之夕有光照烏龍山山色爲之變白云○九峰山在城西五里九峰環峙其上有井出石竅中其水流注西溪溪源出烏龍山繞於此山之陰至杜橋達新安江碑目云九峰菴興福院二記俱宋諫議大夫江公望撰○又五里爲幽徑山漢朱買臣避吳王濞之亂嘗寓此山築室讀書滌硯於池後人因名爲朱池又名其里與橋皆曰招賢宋朱池驛設在縣西三十里入衢

之要路也○橘山在縣南十里險峻如石筍人莫能登舊有羅浮橘產於絕頂橘熟時風飄墜地得者詫以爲仙橘○馬目山在西南二十五里一峰昂然如馬首中有小峰如目一名南高峰其麓有靈惠泉流出爲馬目溪注於桐溪以入新安江碑目云馬目山新廟碑唐開成五年刺史呂述撰○龍門山在縣東二十七里石壁峭峻下瞰江渚有飛瀑噴崖而下○胥口江在縣北二十五里宋設胥口驛今廢相傳伍子胥駐兵于此今有子胥祠瀕江有石如船長一丈五尺每春水退鄉民視舟

中沙石多寡以占歲事又有溪曰胥口溪源出胥嶺逆流達胥口江○雲岫山在東北四十里其水出爲杜息溪東流達清渚港又五里爲湫山高六百餘丈中有石湫俗名聖水又十五里爲午方嶺絕頂有石穴曰金鷄窠○耆老相傳縣西有黃饒村村有陳氏子出家開元寺法名道明得法於黃蘗禪師嘗織草履鬻以養親唐末黃巢兵將壓境道明乃織大履懸於三十里外木杪賊至視之曰彼有人焉遂捨去俗謂此村爲黃巢所饒故名

淳安縣

在府城西百六十里

唐開元初之還淳縣宋宣和初之淳化縣也宣和二年邑寇方臘竊發焚劫州郡已而殲平詔賜今號以綏緝之按淳安令俞彥與廳壁記云縣在三國爲始新卽新都郡治在隋爲新安卽睦州治也大業末陷于歙盜唐初尅復移睦州之建德始改縣爲還淳旋改青溪又改雉山○雉山在縣西南一里形如雉蹲故名與縣東北之靈巖兩相對峙狀若顧揖流泉會于大溪卽青溪也青溪源自黟歙東注浙江一名新安江南齊沈約入新安江詩眷言訪舟客茲川信可珍洞澈隨深淺皎鏡無冬

春千仞寫喬樹百丈見游鱗滄浪有時濁清濟涸
無津豈若乘斯去俯映石粼粼紛吾隔囂滓寧假
濯衣巾願以潺湲水霑君纓上塵唐楊彝過青溪
渡詩天濶啣江雨冥冥上客衣潭清魚可數沙晚
鴈爭飛川谷留雲氣鷓鴣傍釣磯飄零江海客歎
側一帆歸宋梅堯臣青溪行山色碧於溪扁舟泛
落暉水烟帆界破沙鷺槳驚飛島嶼隨流曲漁燈
隔岸微月明何處宿待訪子陵磯○由青溪渡東
去二里有溪左折而北復東北折廿里曰進賢
渡卽古丹陽歙之東鄉也成化間邑人方漢紀略

云吾家自西漢末由河南平陵徙居是溪之上歷
代至今累有聞人惟漢尚書令仙翁儲晉尚書操
唐隱君干宋校理公恪最爲顯著故其鄉里市渡
皆以進賢而名有十二景爲合山夜月端口晴虹
及鸞坡馬石諸處皆其所居之前後也輿地紀勝
云鶴跡石在縣東二十里石高五丈上有鶴跡長
經尺餘又有馬虎跡相蹂雜相傳漢仙翁方儲兄
弟三人各乘一物遊此其跡天然非鏤刻所及縣
東北百里有白鶴嶺亦云仙翁儲乘白鶴駐此其
鶴啄地泉湧今名仙鶴泉○仙翁有祠在端口西

之獅子峰宋方有開詩真仙祠館鎖層嵐下瞰平
疇十里寬譜謀尚標唐篆額風儀仍是漢衣冠紫
芝白兔靈如昨石竭丹湖事不刊千古雲孫牛馬
走敬瞻遺像仰高寒□按賢溪記云歙之東鄉古
葉鄉也東漢書建安十三年遣威武中郎將賀齊
討定丹陽黟歙時武疆葉鄉東陽豐樂四鄉先降
因表葉鄉爲始新縣此置縣之始矣今縣西北六
十里永平鎮有土主廟名賀將軍祠又呼爲葉公
蓋尊之也公字公苗會稽山陰人祠之西配食漢
南部行事南郡守關內侯方公儼東配食本州別
駕襲黟侯方公觀之又傳其地有血湖以方儼方
儕爲儲之兄弟被丞相張林讒五月五日引刀自
刎兩血相濺高二丈餘湖水皆變赤云○志云南
山在縣治南一名青山朱仲晦詩青溪流過碧山
頭空水澄鮮一色秋是也山下有物外亭宋錢時
有月夜游南山記○龍山一名靈巖在縣北六里
山勢宛若游龍而新安江環遶其下唐章八元詩
云雪晴山春露沙淺水痕交蓋詠此○邁山在縣
西北六里新安記云其山重疊秀邁諸峰又云晉
許邁採藥經此仙去故名○隋書云縣西北數里

岡阜隆起昔洪氏者卽其中架屋數楹以待方外之士名曰仙壇○金鈎山在縣東八里狀若金鈎宋方有開來遊有風散烟霏張翠幙月移花影掛金鈎之句○小金山在縣西十里屹立大溪中似鎮江之金山而差小洪揚祖記略云山形偃仰波濤三面涵碧惟一面頗狹可渡水石奇恠軒楹曲折非登舟莫之見也東傍邑郭連亘小洲平鋪如掌草木蒙密西則錦溪當其上流拖藍漾碧北有茂林崇巒氣勢雄立清泉泠泠直其面而淙焉面負蒼崖脉理略與山相協宛劃爲兩緣麓有磴以

探石峒峒有三勢極險峻到者雖暑凜入神骨宋胡朝頴詩綠水遶門迷客渡白雲終日伴僧閒喚取頭陀磨石壁爲渠題作小金山○又八里爲響山石壁如削下有深潭瀕洞舟人呼之其響輒應唐崔顥詩輕舟去何疾已到雲林境起坐魚鳥間動搖山水影崑中響自答溪裏言彌靜事事令人幽停橈向饒景○雲濛山在縣南三十里高五百丈週廻七十里又欲雨則雲霧滃騰山頂其下有泉流若琴筑聲宋汪若宥詩林葉舞風翻趁拍石泉流水自鳴琴○美山在縣東三十五里山勢峭

拔有洞曰仙居連十數洞俱一竅相通外復有洞狀若龍蟠中有石座座上有石盆承于龍口水自龍口而出下溢于盆滿而不溢其近山木多空心石罅中往往出蜜又謂之蜜山○蔗山在東北三十八里山分八面水流十派上有平田數頃五代宋齊丘讀書其上有石室○石門在縣西四十里吳孫和太子避難至此忽大雨平地盡沒刑白牛馬各一以祭三日雨歇石門之跡儼然俗稱時雨石門○又二十里曰都督山相傳方儼爲漢都督所嘗駐兵處山下卽威平鎮圖經云山極高峻臨江以占吉凶凡石崩墮入水者死到半山而止者吉消散至水際者免有官之鎮以此爲驗○又五里爲蜀阜山宋錢時家于山下以其山水酷似蜀之三峽而名時有詩云秋暮之京歲暮還春來更墮藥瓢間眼前有底閒風月恐得經年不上山○芝山在縣南六十里秀出遼溪之上宋西夏都知兵馬使商瑗入朝奏密事因置留馬裔孫輅中三元謚文毅公宅于此其所著集曰遼源曰芝山皆取此也○並桃山在縣西北六十里與紫蓋峰並峙陽其巔則杭欵衢婺之境皆屬指顧自下望之

儼若二桃山南有乳洞深可數里泉溜凝結如乳故名宋鄧侯遊乳洞詩杖藜清曉穿林麓行盡縈迴見茆屋開門倒履出相迎已喜山中逢老宿時當六月困煩暑共憇清音坐空谷上有倒掛千年籐宛若蛟龍蟠古木水聲迸出風雷吼四壁餘音韻金玉仰視溜乳懸珊瑚鼯鼠無端鬪飛撲但覺颼颼心魂飛何日傍巖爲卜築○金紫峰在縣東北八十里高二千餘丈中峰有圓石特起數十丈光瑩無草木其傍兩峰若俯每旭日照灼金紫晃耀故名又五里爲竝山潭宋錢時記略云源出昱

嶺至是瀑垂斗絕瀦而爲潭連三垂瀑而三潭高下相比上者可一畝中者尤大其下則差小旁崖石圍拱口收腹衍如釜束乎兩山之間傾注瀕洞聲振林麓而寒碧淵澄波紋不動嘗有輪麻縷磳石下測之者盡一輪莫竟其底中潭之涯則小山孤起下有巖穴容數十輩水溢從亂石中流出颼颼聞松風聲曰響石又數百步兩崖對峙如堵墻水流其間三潭之別源當合富流漿二水之衝有石柱方廣二丈許從礪底挺然拔起者幾七十尋上下相直不偏倚○又三十里爲東泉山舊名覆

船山傍南一峰高出曰紫瑞峰當龍池之上遠望若芙蓉流泉三派皆自東注元洪震老遊東泉山詩青蓮浴秋水浮出龍王宮平生閱山亦多矣未
有若此奇哉窮金焦靈鷲等培塿詞客誇譚不容口恨君不上千仞岡一見天台與廬阜通都大邑人爭馳一泉一石小亦奇雲頭路絕無人處大有佳山誰得知○在閱縣志治內東有讀書林又東有堂四楹名曰琢句取蘇軾送李陶通直赴青溪任有此去溪山琢句新之語宋嘉定元年知邑事鄭湜記○縣尉廳西序有拄笏軒面勢羣山壯聳

聯峙構此軒以揖之乾道三年周莘記又方有開重脩石渠記云郭內有泉源於北山注爲西池巨闌闔以東澄澈紺紫人愛護之劖石爲渠冶金爲牕而家其上致足喜也○唐文苑傳吳少微當縣人與武功富嘉謨魏郡人並攻古文詞本源經術雄邁過人時號吳富體又稱北京三傑元和初皇甫湜持正以賢良方正對策第一與韓柳爲師友劉禹錫曰安定皇甫湜於文章少有推許蓋重之也隱逸傳載五代方昊字太初以節義自高唐亡耻非所仕遯處崑谷吳越錢氏招之不出聚徒

講學於上貴精舍以終其身鄉人稱為靜樂先生
 □宋邵炳登天聖五年進士授富陽簿秩滿歸築
 樓居名白雲樓隱其上范仲淹守睦州招之不赴
 時號白雲先生□方逢嘉字君會領漕薦任無錫
 尉調轉遂不仕凡所知累以文學政事薦辟皆辭
 其所居馬巖山下號巖隱□元洪震老能詩下筆
 數千言立就領鄉薦與時相書言詞鯁直授州學
 正以母喪去官因不復仕隱石筆峰學者稱為石
 峰先生□何景福字介夫別號鐵牛子學博行修
 以所遇非時一丘一壑詩酒自娛而已所著有鐵
 牛集行于世元末 國初有岐山先生者魯道源
 淵也至正中為賊所執不屈羈置之白石源從容
 吟曰欲死祇今猶未死有生何以更無生久乃獲
 脫居岐山下養疾洪武初徵召不赴

桐廬縣 在府東北
九十里

三國吳黃武四年析富春縣之桐溪鄉為桐廬縣
 上古有桐君者止於今縣東二里山隈桐樹下枝
 柯偃蓋蔭蔽數畝遠望如廬舍或有問其姓者則
 指桐以示之因名其人為桐君其山亦曰桐君山
 突然一峰下瞰桐溪溪源出天台山經於潛東流

六十里至此入桐江江源有三一出徽州一出衢
州一出婺州合三郡水東北注九十里至城南東
流歷富陽合浙江入海山下有合江亭西征記云
自衢歷婺至新定曰睦州二江之水會合亭下有
山巍然直壓其首如渴鰲怒鯨奮迅鬣鬣奔而入
水之狀或云桐君在黃帝時嘗與巫咸同處方餌
有藥錄一卷行于世久已失傳宋紹興間縣令許
由儀訪至山隈有雙小桐在于是立祠山頂繪像
以祀之○圖經古嚴州城在今縣西十五里桐江
西岸隋仁壽二年鴻臚寺丞蘇綸築唐武德初置

嚴州治此又十里爲古縣城卽吳黃武所置之桐
廬縣也隋開皇中併入錢塘其城遂廢今孝泉鄉
之漏港灘有故址存焉○治西北十五里之古城
縣則唐貞觀年移自桐江西岸者及開元二十六
年乃移治北安樂山之第二峰爲今所宋邑人羅
彥真建塔于山頂元末燬○桐廬縣三大字宋仁
散騎常侍徐鉉篆始秣陵刁衍與鉉共事江南後
歸宋衍爲桐廬宰以板素往京師求于鉉得之皇
祐中縣令劉敦刻石吳伯玉爲紀其事南渡後不
存○唐崔峒題桐廬李明府官舍訟堂寂寂對烟

霞五柳門前晚聚鴉流水聲中視公事寒山影裡
見人家移風共美新爲政計日還知更觸邪却憶
陶潛無限酒不逢籬菊便開花李郢送友人之桐
廬寄題江驛桐廬縣前洲渚平桐廬江上晚潮生
莫言獨有江山秀過日仍聞官長清麥隴虛涼當
水店鱸魚鮮美稱尊羨王孫客棹殘春去相送河
橋羨此行宋李恭題合江亭一絲風下碧雲天亭
上牕開霽色鮮嚴子釣臺青樹裡桐君丹竈白雲
邊千家画棟前朝屋百里清江過客船瀟灑桐廬
幾興廢野花山鳥自年年明王禕桐廬舟中瀟灑
溪山夢此邦輕風細雨過桐江川迴幾訝船無路
林缺時看屋有牕野果青苞垂箇箇水禽白羽去
雙雙到家已值重陽節新釀村醅正滿缸○鳳凰
山在縣東二里下矚橫江形如鳳翅故名山側小
坡宋丞相曾懷築遐矚桂崖二亭以資游息後人
呼爲曾公嶺○戴山與桐君鳳凰二山相爲聯屬
劉宋戴顓與父逵兄勃並隱居著名顓字仲若譙
郡人慕越中山水初徙剡縣後乃居此仲若著通
論戴記十篇故山以戴名○舞象山在縣西二里
亦以形似而名山山下有圓通寺又三里爲常山晉

許邁隱此邁字叔玄自餘杭來結樓以居餌木辟穀者數年以山近人境乃四面藩之好道者就見但登樓與語其址尚存又五里爲牛山山當驛道上通閩廣下接杭越屈曲十有五里宋孫紹遠記略云內薄山外瞰江高深殊絕而窪凸屈曲步步必戒如是者十五六里建炎中金兀术入寇歙人錢魯率民兵三千因險設伏大敗金人於此淳熙中邑令向演乃於沿江處所立扶欄七百行者便之元末劉真據縣取石築城扶欄遂廢其中塢之左曰金鷄山有巨石俯瞰大江石上有題詩云天

上金鷄種何時墜此山祇因鳴石上流落在人間

○獨山在縣西二十二里孤峰背起高倚江濱山麓有白水湖溉田甚廣旁有孝子泉晉夏先父亡負土成墳於此湖側因廬墳次時有野火燎山將近瑩域孝先繞墓號慟鳥獸羣集以羽毛濡水灑火俄頃而滅忽有泉湧出其水自黃山入江唐里人司徒董舉居泉側天旱泉欲竭舉乃運石于下以瀦水旣而水漲沙石遂成圻人號董舉圻○又十三里爲富春山一名嚴陵山清麗奇絕號錦峰繡嶺前臨大江乃漢嚴子陵釣處人號嚴陵瀨

按嚴光字子陵餘姚人與光武同遊學及帝卽位光乃變名姓披羊裘釣于齊國大澤中帝遣使三聘而後至除諫議大夫不屈歸耕於富春山山有東西二臺以光故名釣臺各高數百丈西征記云自桐君而西羣山蜿蜒如兩蛇對走於平野之上三江之水並流於崖下驚波間馳秀壁雙峙上有嚴子陵釣臺孤峰特操聳立千仞釣臺下有十九泉唐陸羽茶經品天下水味以此泉當第十九賓于釣臺者爲白雲源一名蘆茨源重崖蔽天林麓繁盛源口對釣臺宋景佑間太守范仲淹過之詢爲方干舊隱遂訪焉其家子孫尚多儒服因作詩曰風雅先生舊隱存子陵臺下白雲村唐朝三百年冠蓋誰聚詩書到遠孫○宋末閩人謝翱嘗叅文天祥軍及信國被害遂登釣臺哭之北向舉酒以竹如意擊石歌曰魂歸來兮何極魂去兮關水黑化爲朱鳥兮有蜀馬食歌已失聲哭因遊白雲源願卽此爲塋地及卒友人方鳳如其言塋之曰宋處士謝臯羽之墓傍有許劍汐社二亭○釣臺之西曰七里灘諺云有風七里無風七十里蓋舟行艱于牽挽惟視風以爲遲速也謝靈運七里灘

詩一瞬卽七里箭馳猶是難
 檣邊走嵐翠枕底失
 風湍但訝猿鳥定不知霜月寒
 前賢竟何益此地
 誤垂竿唐孟浩然前題
 疊嶂數百里浴迴非一趣
 彩翠相氤氳別流亂奔注
 釣磯平可坐苔磴滑難
 步猿飲石下灘鳥還日邊
 樹觀奇恨未晚倚棹惜
 將暮揮手弄潺湲從茲洗
 塵慮李白經釣臺詩松
 栢本孤直難為桃李顏
 昭昭嚴子陵垂釣蒼茫間
 身將客星隱心與浮雲閒
 長揖萬乘君還歸富春
 山清風灑六合邈然不可攀
 使我長嘆息冥棲巖
 石間許渾前題天晚日沈沈
 孤舟繫柳陰江村平

見寺山郭遠聞砧樹密猿聲響
 波澄鴈影深榮華
 暫時事誰識子陵心
 尖山在縣西北十五里其
 山高銳遠望如卓錫然迤東
 有閬仙洞回環三十
 餘丈可容百餘人巖間石乳
 滴溜不竭中有石床
 一畝石籠石橋種種殊絕
 又有金紫巖石泉湧出
 泓澄瑩澈冬溫夏寒病者飲
 之多瘥名曰神泉又
 十里為坦山一名環翠山
 晉郭文允先生隱此山上
 有仙碁石見存又十里為清
 冷山高五千餘仞周
 七十里有洞一穴四面出泉
 溉田五十餘頃宋時
 嘗遣使醮祭今村名謝田是
 也舊以山有大鐘因

名鐘山唐天寶間改今名○縣西三十里有太湖塘在高山頂其山即自鐘山分脉而來曠阜平岡羣峰四擁宛如一城垣湖水當其中朝夕盈縮與錢塘潮汐相應里人俞蓋嘗築室湖南榜曰太湖書室弋陽黃溥為之記○縣西北二十里有白水湖廣一百三十餘畝其中有上湖下湖鴉湖高塘湖之別而白水其總名也○朝使山在縣西北三十五里清冷山之傍山頂巨石高一丈六尺廣八尺下有座遠望如印臺一名印峰又有龍洞山山半有石峽號洞門其巔有龍門池又五里曰藍田

山其陰有一指石長一丈高五尺綴巖谷間以手抵之輒搖動人力多則不能移元楊維禎有一指力可動萬夫莫能移之句又有赤洲嶺縈迴曲折凡三里餘吳越王錢鏐微時嘗憇嶺上其當膝處忽成穴有泉湧出大旱不涸名錢王水穴又五里有焦山巖下瞰溪流波濤洶湧名焦山灘○又十五里為鷄籠山俯瞰溪水下有石洞小舟可通一名靈鷄洞對峙有金鷄石相傳昔有金鷄鳴於石上元何驥子詩鸞鳳高翔短翅低孤飛深入此山棲危機恐墮模金手風雨淒淒不敢啼○又五里

爲周顥嶺昔周禪師顥隱此嶺上通分水縣其地
有石柱山絕頂有石高十餘丈廣丈許望之如柱
故名又有龍盤山山頂有石曰虎嬉登之可見錢
塘城郭又有擔石在江滸兩石重疊上橫下豎卓
立數丈俗呼錢王擔石又有白石山下瞰溪流巖
壁陁絕高五十餘仞又有洪石洞狀如夏屋流泉
一泓上接瑤林洞下達天目溪瑤林洞者石壁五
彩狀如雲霞泉流瀲灩若金石絲竹之聲元末徐
舫嘗避兵其中舫邑人博學能文尤工于詩與青
田劉基爲友洪武初基被徵邀之同行舫荷簞笠
以見示無仕進意所著曰滄江集及瑤林雜詠又
有冷鳩洞地名杏源洞中有石臺流泉二派冬溫
夏涼又五里有垂雲洞可容百人上有穴見天光
旁有石稜萬片狀如晴雲亂墜中多石佛舊名石
佛洞唐貞元間改今名又有館仙洞自洞門梯級
而下石室高敞縈紆曲折莫知所窮內有蟾蜍翠
鵲舊名赤洲洞今名亦貞元間所改○烏石山在
縣東南四十里一名白鶴峰漢孫鍾祖墓在焉鍾
卽孫權祖也其下有賢聖廟○夏口村在縣境唐
明皇雜錄云開元中房琯宰桐廬邢真人和璞自

蔚州府志卷之二十一
泰山來瑄與閒步數十里至夏口村廢寺璞坐松下以杖扣地令侍者掘地得一筭中皆婁師德與未公書璞謂瑄曰省在此乎瑄乃恍然憶未公是已前身

遂安縣

在府西一百八十里

後漢建安十三年分歙縣南鄉安定里置新定縣是時吳大帝使賀齊初平黟歙故也晉太康元年改今名○治據五獅山下按志縣治後有五山其形聯屬似獅子然舊詩云古樹重重擁翠微五山排峙勢如獅邑人董季榮所作○霧山在縣東南

二里孤峰峭立邑之望山也或謂兩浙當牛女分婺州與婺源皆以女宿得名此邑界其中當作婺山而縣東十里有塢山音亦相同邑人吳世良詩曉登十八塢日破萬重山溜滴珠淵水屏開婺宿山○仁山在縣北五里巔有池水傾注爲瀑布高數十丈又十里爲靈巖山亦有瀑布泉其潭深百丈曰百丈潭潭水注爲靈巖溪東南流十五里入武強溪折而西曰靈巖洞有泉自山巔流爲小澗澗中三石若鼎足山腹有泉自石罅滴瀝而下名龍臍泉○武強溪發源武強山峰巒險峻用武者

多資之故後更名靖武溪東南流至三渡溪遶縣治城南復東流入淳安之新安江右武強山去縣西六十里其在縣西七里者爲白石英山十里者爲純和山高百丈上有仙人橋四十里者爲公山圖經云其山有橋自泛于溪上行人噉之五十里者爲霞源山懸崖之上有三石池瀉作瀑布百餘丈名百丈瀑下有叢石激水聲震巖谷間若雷霆相搏其六十里者爲龍耳山舊名兔耳新安記云兩峰直上如兔耳唐天寶間改今名山神號太姥夫人若地方寇發則神鼓先鳴以爲先兆八十里

者爲積雪嶺冬春雪積不消故名○雙龍洞在縣西南五十里洞門高五六丈形如覆釜中有石龍附壁而升者二○乳洞在縣南八十里洞門廣三丈許仰視五六十丈青石如斲其中出泉大旱不涸又有獅子洞洞門差小中有白石蹲踞類獅洞傍有幞頭石屹然臨水高十餘丈廣八丈漢井泉在其下又有石柱聳立山足高數丈圍丈餘又有石缸長四丈卧水中如缸尾懸一石如柁明俞峴詩噴巉孤石似舟橫苔蘚沉埋月色明依稀赤壁秋風下彷彿山陰雪夜行○古蹟志云宋新定驛

在縣城內正北舊縣衙東○縣廳題名記宋邑令
錢建撰靈巖院瀑布記唐大曆十二年前濮州別
駕康仲熊撰遊靈巖集宋慶曆八年殿中丞葛闕
序同賦者十一人○潺湲亭唐會昌六年縣令李
公廉建去治南二十五里○朱晦翁詩刻在縣東
許由山晦翁訪詹儀之過此其詩云許由山下過
川水映明珠流耳懷高潔拋筇墩上娛至今日爲
朱墩○塚廟記云唐交州都督李壽墓在縣西鎮
基山壽封遂安縣公葬此宋真宗東封詔褒贈前
代忠臣郡守田錫以壽名聞于是封壽爲忠勇侯

賜廟英烈今廟廢碑尚存

壽昌縣在府西南
九十里

壽昌縣治碑唐乾寧元年譙國戴公新撰畧云永
昌元年析雉山縣所置先是孫吳分富春縣置新
昌縣晉改名壽昌此在府之東北其治在縣西永
平鄉今之壽昌在府西南其治在萬松山南名適
相同而治所各異攷通典及元和郡縣志皆謂分
富春縣置者非今之壽昌也俗名故城坂有城隍
廟相傳吳立新昌縣時建唐神龍初徙于郭邑里
欲併遷城隍神像百人不能舉因留彼地至今祠

之○圖經青龍山在城東一里峰自西來臨繞艾溪又東曰金姑峰峭削峻拔其麓如鳳翅橫截水曰翠溪流其西○彭頭山在縣西一里臨西湖之上湖水廣袤二百四十步跨以飛梁唐景福中縣令戴筠開導以灌東郭之田餘浸入于艾溪艾溪上接大同溪並流至顏公橋合曹溪南流又合清潭溪折而北流合周溪溪之南有山曰默山宋胡楚材彭頭山詩久客倦行役故山安在哉松篁讀書室水石釣魚臺明月照歸夢清風吹酒盃亭亭籬下菊寂寞爲誰開按楚材縣人仕秘書郎以剛

直忤權貴歸隱于此所著有默山集○南山在縣南三里高八十餘丈其巔有池靈蜃居焉一名仙池山胡楚材詩峻峭插天山仙池在絕頂無源水自溢泓澄照天鏡○又四里爲天井山其水豎流注于石窟名曰天井又八里爲金臺山山峰如露臺日色臨照其上故徐安貞有金臺捧日之詠又其地有烏石山中有大小烏石對峙嶙峋清溪潭之源出於此流合爽溪過南浦會董源水北流入艾溪又折而五里曰大慈巖有石筍突峙其上登之可覽金衢二郡之勝○明山在縣北五里巖壁

特聳時見光明故名又一里爲巖山有三峰高數百丈頂上巨石迺抱如負屨狀又十二里爲過浴山下有流泉自洞口瀉入地穴深不可測名曰龍潭潭上又有洞穴名曰龍門過此則石壁峻立仰視山巔如牖而明名曰天窓又過此則不能窮山下出泉發爲三派一爲周溪合天井雙溪陳源天山諸溪之水入于艾溪一爲協儒溪至巖墅與後塢水合南流經至仁橋入于塌溪一爲五里溪南流至新市渡入湖神溪○岑山在縣東二十里巖谷清曠其北爲燕山每遇亢旱烟霧上橫群燕翔集卽雨岑山之南爲赤孤山有石赭色壁立孤峻俗傳赤仙姑曝裙于此亦名赤姑山又有夷山丹崖碧巘若屏障然又五里曰長嶺路通金衢宣歙四郡嶺半有泉下注爲池竹谿之源出焉流至駱村合石泉水北溪入湖神溪○右岑山爲宋國子監丞鄭彥讀書處余誼詩云九曲岑山九曲奇萬年高樹萬年枝水盤幽澗通池遠花碍深雲落塢遲種竹生孫添舊譜換茶留客了殘碁監丞去後留遺跡依舊烟霞似昔時○玉華山在縣東南二十里山高數百丈石色映空如玉故名又十里爲

巖峒山有五峯曰華蓋曰羅帽曰玉露曰慶雲曰景星而華蓋最高南屬金華北屬嚴州翠溪之源出焉流逕魚跳山以至金姑峰下入於竭溪又發爲龍溪至玉虹橋與過塘水合入湖神溪○青山在縣西十里唐聘君翁泚隱居之所又十里爲天湖山山上有池流下溉田冬夏不竭故名又十里爲藥山山半有泉清冷瑩徹名曰藥泉又五里曰金紫峰三峰突起中峰最高左右輔之又五里曰四靈山四山拱揖形肖麟鳳龜龍宋樞密葉義問故居在焉有棲霞洞洞極深邃水常泛溢有風洞夏涼冬溫又有氣洞將雨則煖如烝唐縣令穆均嘗遊此李頻從行穆吟曰一徑入雙崖初疑有幾家行窮人不見坐久日空斜頻續云石上生靈草泉中落異花終須結茅屋來此學殮霞穆深加嘆賞頻名自是日振又西十里曰塘山石逕屈曲上有二池分流巖壁狀同瀑布又十里曰朱山山上有繫虎壇金鷄巖南曰鷺籠山其水出爲壽昌溪一名大溪流入新安江○梅嶺在縣西南四十里接龍游縣境宋建都臨安時此嶺最爲要道凡閩蜀江西荆湖二廣雲南八番海外諸國來者皆經其

下今則取道于蘭溪矣○其東南者曰長嶺在龍溪之上宋鄭以耕詩峻嶺迢迢一徑分往來行客迂登雲上方應是禪關近清磬悠悠十里聞又題龍溪詩溪流環抱碧縈紆好似盤龍護草廬石嚼曉波寒骨露月澄秋水夜光虛

分水縣

在府東北一百五十里


唐武德四年析桐廬之西鄉置縣以桐廬江水中分因名分水及寶應中又析分水置昭德縣在治西北嘉德里旋廢宋爲昭德驛○天目溪在縣治東源出天目山逕於潛昌化繞縣境而入桐江○

慶雲山一名五雲山在縣治東南唐長慶中里人施肩吾及第山上有五色雲見下映湖水卽東湖也又南有湧泉巖巖下有湧泉池○與五雲相連者曰塔山上有塔院宋學士邵忠立有記王鑛詩云珠樹法華曾護塔靈巖曇水舊通湖○千佛巖在城東十二里邑人方子容鑿巖石作千佛形以祐母者又三里有紫羅山唐邑人羅萬象隱此浙西觀察使李德裕使人召之萬象逃入深山結白雲亭以居終身不出又二里有秦游山相傳秦始皇朝天日度民朝見於此因名叅秦山唐天寶間

改今名○紫龍山在縣南二十里上有龍池其對
峙者爲石柱山山各有石柱峭直狀似削成故名
○鍾山在縣西三十里山半有洞泉出其中流注
山下又五里爲覺道山昔有二道士入山修道不
知所之惟石壁上有二道士影晴日視之宛然○
又五里爲鳳翔觀碑曰云鳳翔觀碑唐試太子校
書郎盛孺安撰按卽今之德輝觀也宋宣和元年
詔改今額以古有威鳳翔集茲山故名郡守隴西
李公時道士羅玉京刻石○柳山廟記宋紹興七
年知縣王瑞撰○施肩吾寄徐凝詩宋熙寧間知
縣齊諶刻建中靖國元年諶爲轉運使刻肩吾
及第告于碑陰○郭祥正題名在縣學祥正與蘇
子瞻爲友熙寧中因訪邑宰題識歲月○塚記云
吳九真太守何瑛墓在縣西北勞山俗呼瑛公墓
○桐栢張真人塚舊傳張天師祖也在縣北管生
仙外鄉○宋右司諫王縉墓在縣西十五里茅山
張拭誌○太守王知元墓在延洪寺後山江公望
誌

廣州府志卷之十一

十一



卷之四